


Masigpit Ang Pultahan

 Salamat, Igsoong Neville. Salamat. Pagkamaanindot gayud ang makabalik sa Balay sa Ginoo. Kanunay ko gayud ginakalipay nga makabalik sa tabernakulo, bisan asa pa ako moadto. Aduna sa kung unsang butang bahin niining karaan nga dapit nga gusto ko nga balik-balikan. Kini gyu'y, oh, ako . . . Kini ang una ug ang bugtong iglesia nga ako sukad gipastoran. Ug daw sa maayo kaayo nga makabalik na usab dinhi. Ug nagatoo ako nga sa nianang halangdon na nga buntag pag nagdumili na ang adlaw sa pagsidlak ug ang mga bitoon nagakawala na ang ilang kasanag, nagatoo ako nga aduna og pipila gikan sa niining tabernakulo ang maanaa nianang adlaw, nga mga gihugasan na sa Dugo sa Cordero. Ginapaabot ko kanang panahona.

² Bag-ohay lang sa pagsulod ko sa lawak, natagbo ko si Igsoong babayeng Arganbright dinha sa likod. Ug giingnan niya ako nga adunay pipila ka mga tawo ang ania dinhi nga nakatambong kaniadto sa panagtigum sa Kingston, nga miduaw niadtong panahona, ug akong . . . ang . . . malipayon gyud ako nga nakaanhi sila ingon nga usa ka pagpamatuod. Kung asa man sila dapit, kung ipataas nila ang ilang mga kamot, nga atua kaniadto sa panagtigum sa Kingston didto sa Jamaica. Mahimo lang, oo, atua didto sa likod. Sige, maayo kana.

³ Nakita ko ang post card ni Oral. Siguro napahibalo n'yo na ang iyang mga panagtigum. Wala ko kahibalo niini hangtud, sa mga petsa niini, hangtud kagahapon. Mosugod kini tingali sa ikaunom, dili ba? Sa ikaunom hangtud sa ika-kinse, si Igsoong Roberts didto sa Louisville. Karon, pag-adto og pagpatalinghug kaniya. Si Igsoong Roberts usa—usa ko ka suod nga higala, ug usa ka tinuod nga alagad ni Cristo. Ug nakasigurado ako nga malipay gayud kamo sa iyang mga mensahe, sa matag gabii. Ug usa ka . . . ang iyang, sa iyang pag-ampo alang sa mga masakiton, ako—nakasigurado ako nga makita gyud ninyo nga nagapamuhat ang Dios, tungod kay usa siya ka manggugubat sa pagtoo, si Igsoong Roberts, ug usa ka tawong gigamit sa Dios sa daku kaayong paagi. Ug milambo ang iyang ministerio gikan sa . . .

⁴ Mahinumduman ko niadtong una ko nga naila si Igsoong Roberts, didto siya sa usa ka gamay nga gisíon nga tolda didto sa St. Louis, Missouri, ug ako . . . dili, didto diay sa Siyudad sa Kansas, Missouri. Ug atua ako kaniadto sa Siyudad sa Kansas, Kansas, didto sa usa ka awditoryum. Naglingkod siya didto sa lingkuranan sa atubangan. Pagkahuman sa panerbisyo, miadto kami sa likod ug nag-estoryahanay. Gipaila-ila nila ako kaniya. Mas bata siya kay kanako; anaa si Oral sa mga sugod pa lang sa

kuwarenta. Ug miingon siya, “Sa tan-aw mo ba nga dunggon sa Dios ang akong pag-ampo alang sa mga masakiton?”

Ingon ko, “Igsoon, pagadunggon Niya ang pag-ampo ni kinsa man nga magaampo.” Bueno, misugod na siya kaniadto, ug miingon siya, “Ania na ako!”

⁵ Ug usa siya ka maalam kaayo nga tawo, ug nakaeskwela sa kolehiyo, upat ka tuig sa sikolohiya, ug sigurado ako nga usa siya—usa siya ka maalam nga tawo. Ug naabot niya ang punto karon nga aduna na siya’y pundok sa mga mananambag sa palibot niya, ug ingon-anang mga butang, hangtud nga, pagmosulti siya, iyang—iya gyud kini ginahunahuna. Ug malipay gyud kamo kaniya, nakasigurado ako.

⁶ Ug busa karon gusto ko nga maghatag og usa ka gamay nga balita mahitungod sa kung unsa ang gibuhay sa atong Ginoo didto sa among gamay og ubos nga panagtigum didto sa Jamaica ug didto sa Puerto Rico. Talagsaon kadto nga butang nga nakaadto ako didto, tungod kay daghan lagi nga mga tawag ang among nadawat. Ingon nga si Leo dinhi nahibalo na, nga ang telepono . . . Ug sa pagdagan sa tibuok semana, adunay literal nga ginatus ka mga lugar ang nagapanawag alang sa mga panagtigum. Apan bisan pa niana gusto ko nga mabati nga gipangunahan ako kung asa ako moadto, sama niadto. Kung moadto ako tungod sa tawo nga nagpaadto kanako, kung ingon-ana nagaanha ako sa ngalan sa nianang iglesia o sa nianang organisasyon. Kung moadto ako tungod kay miingon si Igsoong Neville nga kinahanglan akong moadto, kinahanglan ko nga moadto sa ngalan ni Igsoong Neville. Apan gusto ko nga moadto pag si Jesus ang nagasugo, nga makaadto ka sa Ngalan ni Ginoong Jesus, sa pagpakigtambo sa mga tawo.

⁷ Ug naghigda ako sa higdaanan, ug medyo gikapoy ako. Kini nga walog, sa dili magdugay, kinahanglan kong biyaan kining waloga, tungod nga ginapaantus lang niini ang akong tutunlan ngadto sa punto nga dili ko na gyud maagwanta. Mahimo akong mohawa ug mobalik lang. . . Miabot kami sa miaging adlaw, ni Leo ug ako, sa mga kuwarenta ka milya, pagkagikan sa mga kalapukan didto sa Florida, nga hawan na ang tibuok kong tutunlan, ug sa mga kuwarenta ka milya sulod sa Louisville mibalik na usab kini. Siguradong ania gyud si Igsoong Banks Wood kung asa man ning buntaga. Ug sa miaging adlaw nga miabot ako gikan sa Kingston ug—ug sa Puerto Rico, kon diin nga maayo kaayo ang akong tutunlan; ug pagkanaug sa eroplano, okey pa; ug sa wala pa kami makaabot sa Jeffersonville, mibara na usab kini. Kita n’yo, tungod kini sa walog dinhi. Ang kagaw kini diha sa hangin, o mahimo ang Dios kini, ang usa, nga nagapaninguhang ipalakaw na usab ako. Busa, ako—dili ko masabtan kini. Nag-ampo na ako ug naghangyo sa makadaghang higayon.

⁸ Apan, bisan pa man, nakamata ako, mga alas tres na kadto sa buntag. Ug ang akong asawa ug ang bata ko nga lalaki tulog pa. Ug mibangon ako diha sa kilid sa higdaanan, ug nakita ko ang usa ka dakung panon sa mga tawo nga nagkatigum didto sa usa ka dakung lugar, ug giingnan ko si Billy Paul, “Adto ka didto ug hatagi’g mga prayer card kadto nga mga tawo.”

⁹ Ug miingon siya, “Sige, dad.” Mibalik siya sulod sa pipila ka minuto, ug miingon, “Dili ka puede manghatag og mga prayer card sa kadtong mga tawhana.” Miingon siya, “Nakita mo ba kining tawo nga nagatindog dinhi?”

Ingon ko, “Oo.”

¹⁰ Miingon siya, “Niadtong ania siya dinhi, ug miingon ako, ‘Ang si kinsa man nga gusto og prayer card, ipataas ang inyong mga kamot.’” Ug miingon, “Miadto ako aron hatagan siya og prayer card, milakaw siya sa kung asa man. Ug miadto ako didto, ug miadto na usab siya sa kung asa nga dapit. Karon ania na siya dinhi dapit.” Miingon, “Dili ko gani mahimo ang paghatag og usa ka prayer card.”

¹¹ Ingon ko, “Bueno, Billy, dili mo man gyud kinahanglan manghatag og mga prayer card, tungod nga aduna ma’y ingon ka daku nga lugar dinhi hangtud ang tanan makahimo og. . .” Ang mga prayer card maoy aron nga wala’y gubot. . . nakita n’yo, ug ipahigayon ang mga niini nga may kahan-ayan. Ingon ko, “Oh, mahimo ko nga atimanon ang tanan dinha, sa ingon ka luag nga lugar nga aduna ako, ug ipalinya sila ug iampo ang matag usa kanila.”

¹² Ug miingon siya, “Sige.” Ug mipaingon siya sa tuo ug milakaw na palayo kanako. Ug mipaingon ako sa *niini* nga direksyon samtang siya mipaingon *niadto* nga direksyon, ug nga ginalantaw ko siya.

¹³ Ug nadungog ko ang usa ka Tingog gikan sa Langit, ug miingon, “Apan sa niining higayona sugdan Ko ang pagpasidungog kanimo.” Ug milantaw ako, ug wala ako sukad nakakita og ingon ka daghan sa mga tawo, nanagpunsisok sila nga gikan sa tanang dapit.

¹⁴ Ug gitawag ang ngalan ni Igsoong Roberts, miingon, “Karon moabot si Igsoong Oral Roberts aron makigkita kanimo.”

Ug ingon ko, “Unsaon ko kaha pagtimbaya kang Igsoong Roberts?”

Miingon, “Pareho lang kung unsaon ka niya pagtimbaya.”

¹⁵ Bueno, nakita ko nga nagasingabot si Igsoong Roberts nga naka-amerikana nga itum, ug naka-kalo nga sama sa kalo nga ginasul-ob ni Bing Crosby, kanang mapilo mo paubos ug pataas, usa ka itum nga kalo. Ug medyo patindog na ako niadto, ug mitan-aw siya didto ug miingon, “Kumusta na, Igsoong Branham.”

Ug ingon ko, “Kumusta, Igsoong Roberts,” gilamano ko siya. Miingon, “Daghan ka’y mga tawong nanambong.”

¹⁶ Ingon ko, “Igo-igo lang nga mga tawo, Igsoong Roberts.” Ug miliso siya ug milakaw na palayo sa direksyon nga gipadulngan usab ni Billy, sa tuo.

¹⁷ Ug nahunahunaan ko, “Asa man kaha ako magapakigsulti kanila?” Ug gisulayan ko na sa kung asa na lang aron makakaplag og lugar kon diin puede akong makigsulti. Atua ako niadto sa kahimtang, nga medyo naminghoy, dili ko makita kung asa gayud aron—aron nga makapakigsulti ako kanila.

Ug adunay miingon, “Bueno, ari ka dinhi.”

¹⁸ Ingon ko, “Bueno, dili ka na makakita og lugar nga mas maayo pa dinha.” Ug gisugdan ko pag-adto ang maong lugar. Ug nahinumduman ko kini dayon, ingon ko, “Ang pinakamahinungdanong butang nga angay ko nga buhaton mao ang magpabilin nga mapainubsanon diha sa akong kasingkasing, kanunay, sa atubangan sa Dios ug sa Iyang mga anak.”

¹⁹ Ug nanumbalik na ako gikan sa maong panan-awon. Ug sa hunahuna ko, “Unsa kaha ang kahulugan niana? Ang pasabot niini tingali nga magkaaduna kami og ingon gayud ka... O asa kaha kini, asa kaha siya paingon?” Nakita n’yo, usahay, diha sa mga panan-awon, dili Niya ginasulti kanimo kung asa gayud, Siya—nagasulti lang Siya ug imo lang... Daw sa sambingay kini. Ug sigurado ako nga kamo nga nagabasa sa Biblia nakasabot niana.

²⁰ Ug dayon misulod ako sa atbang nga lawak ug milingkod sa kadali, ug mga alas tres y media o alas kuwatro na kadto sa buntag. Katulgon na ako kaayo niadto. Mibalik ako ug mihigda, ug nagdamgo ako og usa ka damgo, ug pagkatalagsaon kadto nga damgo. Ug halos tanan kaninyo nakaila na sa usa sa akong mga manedyer, si Jack Moore, si Igsoong Jack Moore. Kaila ko siya sulod sa dugay nang mga katuigan. Abi ko nga migawas kono ako nga uban ang iyang anak nga babaye, usa ka batang babaye nga mga dise-siete anyos ang panuigon, ug uban ko siya nga gigunitan ang iyang kamot, ginatultolan ko siya patungas sa bungtod, ang batang si Jackie. Bueno, kaila ko na siya sukad niadtong masuso pa lang. Ug ginatultolan ko siya kaniadto patungas sa bungtod, ug gilatas ko ang tulo ka bloke sa siyudad patungas sa maong bungtod, nga ginatultolan kini nga batang babaye. Ug miabot kono kami didto sa ilalum sa usa ka daku nga kahoy, ug milingkod siya. Ug sama sa daghang tinedyer nga mga batang babaye sa karon nga nagasul-ob og mga palda nga, kabalo na mo, kanang medyo nagabukad, ug nakasul-ob siya niadto og usa sa niana nga matang sa mga palda. Ug gigunitan niya kini nga palda ug medyo gibukhad kini ug milingkod. Ug sama nga ang mga batan-on kasagaran nagatan-awanay sa usa’g usa, iyang gikiyugpos ang iyang mga kamot nga sama *niini* ug

misugod sa paghangad ngadto sa kawanangan. Bueno, usa ka buutan kaayo nga batang babaye si Jackie, apan aduna siya'y daku nga baba ug dakung mga mata, ug medyo balason ang kolor sa iyang buhok, dili gyud ingon ka matahum, apan usa gyud ka tinuod nga dalaga. Ug makita ko ang dagku niyang mga mata samtang nagalantaw siya ngadto sa kawanangan, ug kung unsa nga ang kawanangan nagareplektar diha sa iyang mga mata.

21 Bueno, mipalayo kono ako og mga lima ka pye gikan kaniya, ug medyo mihigda og patakilid nga sama *niini*, ug mikuha og dagami ug gibutang kini sa akong baba, ug sugod nga giusap kadto nga dagami. Ug misugod ako paghunahuna, “Unsa ma’y ginabuhat ko dinhi? Aba, ako nga usa ka tigulang na, ug uban niining batan-ong babaye. Aba,” Ingon ko, “Minyo na ako ug dagha’y mga anak. Wala ko og unsa man nga katungod nga maania dinhi uban sa niining batan-ong babaye.”

22 Ug misugod kono ako nga mitindog. Ug, sa pagtindog ko, may usa ka Tingog nga gikan sa kahoy, ug miingon, “Kini para sa usa ka ilhanan ug para sa usa ka katuyoan.”

23 Ug nakamata ako, ug halos ako misiyagit, usa—usa ka mangil—ad nga damgo. Sa hunahuna ko, “Oh, nagapasabot kaha kana nga ma-backslide ako o adunay butang nga mahitabo kanako? Bueno,” sa hunahuna ko, “kung paninguhaon ko nga gamiton ang kaugalingon kong panghunahuna, malibog lang ako kung ingon—ana, busa hulaton ko na lang ang Dios.” Ug misugod ako sa pag—ampo. Ingon ko, “Ginoo, kana ba nga damgo nagpahinungod ngadto sa maong panan—awon sa sayo pa nga bahin sa kagabhion, o unsa ba ang kahulogan niini?”

24 Human sa paghulat ko og pipila ka gutlo, mga usa ka oras tingali (Nakabangon na niadto ang akong asawa ug nakaandam na og pamahaw.), dayon mibalik na usab ang Tingog, ug miingon, “Moadto ka sa Kingston, ug igasulti kanimo didto kung unsay pagabuhaton.”

25 Busa, sa gilayon miadto ako sa Kingston. Ug ilang—ilang nahibaloan niadtong hapon sa Huwebes nga moabot ako didto pagka—Biyernes. Kadto lang ang pagpahibalo nga nahimo namo. Dili gyud ako maayo sa paghimo og . . . ? . . . o sa pagbanabana og gidaghanon sa tawong nagapanambong, tungod kay kasagaran mapasobrahan ko kini. Apan sa unang gabii, masulti ko nga mga dose kami, oh, mga dose ka gatus nga mga tawo, didto, tungod kay napahibalo kadto sa usa ra ka adlaw. Ug pagkasunod nga adlaw nagpasugo sila og mga mensahero nga daganon ang gilay-on nga upat ka milya, nga tunoltunol, patungas didto sa kabukiran. Mobiyahe og upat ka oras ang usa ka mensahero, ug dayon ipabiyaha ang usa ka sunod na usab ka mensahero patungas didto sa bukid. Ug sa ikaduha ka gabii aduna na’y lima ka libo. Ug sa ikatulo ka gabii gibanabana kadto nga mga kinse

na ka libo, tingali mga baynte. Ug adunay linibo ka pilo kaniadto ang miduol kang Cristo.

²⁶ Ug ang maong panan-awon, mao ang gamay nga iglesia, ulay ang mao nga batang babaye, bata pa lang, ug nagpasabot kadto sa pagkaulay sa iglesia. Ug ang tulo ka bloke sa siyudad patungas sa bungtod, mao'y tulo ka adlaw nga ako magaministerio. Ug ginadala ko ang maong ulay nga iglesia pinaagi sa akong ministerio, gikan sa kung asa siya kaniadto, pasaka ngadto sa mga butang nga iya sa Dios, hangtud nga mitay-og kadto sa tibuok nga isla.

²⁷ Ug, oh, ang mga ministro ug ang mga tawo didto, nanggihilak ug nagpakilooy ug nanaghangyo, “Usa na lang unta ka gabii o duha pa,” ang mga opisyaes sa siyudad.

²⁸ Gikan didto miadto kami sa Puerto Rico. Gitagbo kami didto sa dakung, halangdong kadaugan, ug linibo ka pilo ang nagpunsisok didto sa maong lumbaanan, hangtud nga gibanabana kadto nga mga kuwarenta ka libo ka hamiling mga kalag ang miduol kang Ginoong Jesus. Ug sa pagpadayon, nagalaum ako nga akong . . . Isulti ko kini sa kaugalingon ko nga iglesia, apan dili ko kini mabuhat sa publiko, didto kon diin nga wala ang mga kaiglesia ko, tungod kay mahimong masayup ang pagtan-aw niini. Apan ania kanako ang ngalan sa huwes nga nalista diha sa usa ka panid sa papel, nga nagsulti niadtong palakaw na kami, dinhi mismo, siya ug ang iyang mga kawani.

²⁹ Ug ako . . . Siya—mingon siya, “Napasidunggan kita sa pulo nga nabisitahan sa nagkalainlaing mga ministro.” Miingon siya, “Niadtong mihawa si Mr. Billy Graham bag-ohay lang,” ug miingon, “nagkaaduna kita og usa—usa ka mahimayaong panagtigum,” ingon niya, “Apan naghatud lang si Billy Graham sa mao ra gihapon nga Maayong Balita nga dugay na natong nadungog.” Ingon niya, “Dayon napasidunggan kita nga nabisitahan ni Mr. Roberts dinhi sa pulo,” ingon niya, “ug gihatagan kita ni Mr. Roberts og usa ka halangdon nga tulo-ka-adlaw nga panagtigum. Apan,” miingon, “pagkataas kaayo ang mga gasto sa hotel,” ingon pa, “nagbilin og traynta’y singko ka libo nga dolyares sulod sa tulo ka gabii, ingon nga nagasto didto sa hotel.” Ingon niya, “Dayon nakaanhi usab si Mr. Osborn, nga usa ka bantug nga alagad ni Cristo. Apan,” miingon, “niadtong milakaw na si Mr. Osborn, aduna gyu’y pagpaminghoy,” ingon, “daw sa nahutdan gyud ang tanan.”

³⁰ “Apan,” miingon, “nahimatikdan nato sa niining panagtigum nga halos wala gyu’y tawo diha sa entablado nga igaampo ni Igsoong Branham. Apan,” miingon, “pagkahuman sa panerbisyo, nanghakot kita og trak-trak nga mga wheelchair ug mga sungkod ug tanan na, dinha sa mga nanambong.” Ingon niya, “Dili na gyud usa ka tawo niining higayona, ang Dios ang mianhi kanato,” ingon niya.

³¹ Ingon ko, “Ayaw pagsalig sa akong mga pag-ampo; kondili ang inyong mga pag-ampo dinha, ipandong ang inyong mga kamot sa usa’g usa.” Ug modala sila og usa ka dosena o duha diha sa entablado, ug, sa diha nga nagaabot na ang pag-ila, nagasiniyagit na lang ang mga tawo. Miestar kami sa usa ka fourth-class nga hotel, ug gibayaran ang tanan nga kaugalingon namong mga gasto ug mga lakaw, kami mismo.

³² Mitabang kamo nga mabuhat kana, kamo mismo, pinaagi sa inyong mga ikapulo nga ginapadala ninyo kanako. Mao kana ang nagpahigayon niini. Ug gusto ko nga mahibaloan ninyo nga, sa tanan niana, aduna kamo’y kabahin niini. Ug sa daku og mahimayaong adlaw nga moabot, pagagantihan kamo sa Dios niana. Kita n’yo, dili ninyo kinahanglan . . .

³³ Kung ang maong tawo moadto ug magbuhat og usa ka butang, dayon, makita ninyo, nga pagmohawa na kana nga tawo, mohunahuna silang, “Usa kini ka dakung makapaminghoy, gibiyaan na kita sa Dios.” Wala kamo ginabiyaan sa Dios. Kanunay ninyo Siyang kauban. Kita n’yo, ingon kamo ka aktibong kabahin niini sama sa, sama sa kang kinsa man. Mahimong gamiton sa Dios ang usa ka tawo para sa usa ka ministerio, pero wala kana nagapasabot nga kana lang nga tawo ang may katungod ngadto sa Dios. Ang kaugalingon mo nga pagtoo kini ngadto sa Dios.

³⁴ Ug nagaadto sila didto nga sakay sa karaan nga mga kariton, ug gamiton nila nga daw sa kariton pang-bata, ug butangan kini og tabla, ug ipahigda dinhi ang mga tawo ug itulod pasulod. Ug pagkahuman sa panerbisyo, pagahawanan na ang tibuok lumbaan, adtoan nila ang mga bagon ug panghiposon ang maong gagmay’ng mga karomata ug karaang mga wheelchair, ug mga sungkod ug mga teheras ug mga higdaanan, ug kung asa mismo sila ninghawa ug gipangbiyaan ang mga niini, tungod nga atua didto ang Presensiya sa Ginoo. Mao kana ang gusto natong makita. Wala na ang tawo sa maong esena kung ingon-ana, ang Dios ang nagapanglihok.

³⁵ Sa pagbalik ko, aron lang nga makatabang karong buntaga, magapamulong ako taudtaod. Ug gihangyo ko ang atong mga kalalaken-an nga dili ipagawas ang teyp. Tulo ka adlaw ko nga gihunahuna og ayo, “Unsa kaha ang akong igasulti?” Ug kaganinang buntag, sa wala pa ako milakaw, mibati ako og usa ka estriktong pagpasidaan sulod sa akong kasingkasing para sa iglesia. Ug giingnan ko sila, “Iteyp ninyo, pero ayaw kini ipagawas aron ibaligya.”

³⁶ Apan sa dili pa nato kini buhaton, gusto ko nga hatagan kamo og usa ka hamubo nga testimonyo, para makapabati og maayo kaninyo. Nagpabati kini og maayo kanako. Mibiyahe kami kaniadto para sa tulo ka adlaw nga pagpangisda, si Leo ug si Gene ug ako, ug ang anak ko nga si Billy Paul ug ang

iyang asawa, didto sa usa ka higala nga nagaanhi sa tabernakulo, nga gikan pa sa Georgia. Ug gidala nila kami didto sa kung asa nga lanaw, wala ko kahibalo karon kung asa gayud kadto dapit, nga duol sa Okeechoobee o mora'g ingon-ana, wala ko kabalo sa ngalan niadto nga gihinganlan sa mga Seminole Indian. Apan, bisan pa, taas-taas nga milya ang gilay-on namo didto.

³⁷ Ug kining si Igsoong Evans, usa pa ka makasasala ang igsoon niyang lalaki. Ug usa kini ka hanas nga mangingisda, ug nangisda siya didto sa mga lanaw mga pipila na ka bulan ang milabay. Ug aduna sila didto og ginatawag nga “ground rattler.” Ug gipaak siya sa mao nga ground rattler, ug halos mamatay na siya kaniadto. Nanghubag ang iyang tiil, ug ila siyang gidala sa mga doctor ug giindyeksyonan nila siya. Makamatay ang ingon nianang mga butanga. Ug aduna usab sila didto og daghang mga halas nga cottonmouth, cottonmouth, moccasin, mga buaya nga hangtud baynte ka pye ang taas.

³⁸ Ug samtang nga nagapamingwit kami didto, nakabingwit ako og usa ka daku nga isdang-bass. Oh, usa gayud kadto ka tinuod nga adlaw sa—sa paglingawlingaw. Ug pagkadaku kadto kaayo nga dili ko kadto mabira gikan sa tubig, ug napatanos niini ang kaw-it ug mipalayo, o milugnot kini aron makapuyas. Ug nakabingwit kami og daghang mga isdang-bass, mga usa ka gatus ug singkwenta ka libra sa dagkung mga isdang-bass. Ug ang mga niini, ang uban sa mga niini nagtimbang og pipila ka libra, ug gikan sa kuwatro hangtud sa siete, otso libras. Ug nabingwit ko kining usa ka daku, ug nakalingkawas kini.

³⁹ Ug giitsa ko balik ang taga, ug ako—nakabingwit ako og usa na usab, mga sais, siete libras. Ug aduna ako kaniadto og taastaas nga tukon nga kinahanglan mong alsahon ibabaw sa mga dahon sa lirio. Ug si Igsoong Evans aduna og. . . Basá gyud kami tanan tungod sa pag-ubog sa tubig, tungod kay lanaw kadto. Ug gipuhas niya ang iyang mga sapatos ug gilislis niya ang iyang karsones, ug naglingkod na didto sa mala nga dapit, medyo nga ginapauga ang iyang mga sinina. Ug nakita niya kining daku nga isda nga nagkisikisi didto sa maong mga sagbot sa tubig, ug milusbog ako paadto niini. Miingon siya, “Kadyut lang, Igsoong Branham, ako na ang mokuha niini para kanimo.” Ug midagan siya didto. Ug nabira ko na kini, halos siguro patay na ang maong isda, nga atua ibabaw sa mga dahon. Ug midagan siya didto para kuhaon kini. Ug, pagkuha niya, nakatig-ik siya, ug ania na siya nga mibalik. Usa ka halas nga Rattler ang mipaak kaniya.

⁴⁰ Ug gitan-aw namo kini, ug adunay mga binuslotan sa mga tango diha sa iyang tiil kon diin siya gipaak sa Rattler, ug nagpaantus gyud kini kaniya ang kalala hangtud nga may mga luha na sa iyang mga mata. Ingon niya, nga ang pagbati niya maingon nga ang mga bukog niya nagakaparalisa. Ug atua kami didto, sulod didto sa mga kayanangan nga milya-milya ang gilay-on. Usa siya ka dakung tawo para alsahon.

Ug pagnapaakan ka sa usa ka halas, malala ang bation mo sulod lang sa pipila ka minuto hangtud nga halos mamatay ka na. Ug atua didto si Leo. Ug usa ka butang ang miabot sa akong hunahuna, “Ikaw sa gihapon ang Dios!” Ug sa diha nga ginagunitan niya ang iyang tiil ug ginapislit kini, ug kadtong duha ka dagku nga binuslotan sa tango kon diin siya napaakan sa Rattler, gipandongan nako sa akong kamot kadto nga dapit ug miingon, “Ginoo, nahisulat na diha sa Imong Pulong, ‘Makatunob sila og mga ulo sa mga bitin ug mga tanga, ug walay bisan unsa man nga kadaut ang mahitabo kanila.’” Ug niadto mismong taknaa, ang tanang kangutngot mibiya na sa iyang tiil. Misul-ob na sa iyang sapatos ug namingwit tibuok adlaw.

⁴¹ Misulod siya niadtong gabii ug giestoryahan niya sila mahitungod niadto, miingon sila, “Mas maayo nga magpa-doktor ka.”

⁴² Miingon siya, “Kung gipanalipdan ako sa Dios hangtud niining taknaa, pagaampingan Niya ako sa hangtud-hangtud.” Tulo kami ka adlaw nga namingwit, wala man lang og unsa man nga sakit nga gibati.

⁴³ Dios sa gihapon ang Dios. Ginatuman Niya ang matag saad. Ug sa tibuok kong ministerio, kadto ang pinakaunang higayon sukad nga miabot ang Dios sa pagtabang sa usa ka napaakan sa halas, tungod kay mao kadto ang pinakauna nga nagkaaduna ako og higayon nga mag-ampo alang sa usa ka tawong napaakan sa halas. Ginapahibalo lang kaninyo nga ginatuman Niya ang tanan Niyang mga saad, ug ang Iyang mga Pulong maayo ug matuod. Amen.

⁴⁴ Timan-i ang mga panerbisyo unyang gabii ug karong Miyerkules. Ug mag-ampo karon alang sa usa ka tawong nanginahanglan gayud nga maiampo, ako kana. Ug, timan-i, magtambong kamo sa panagtigum ni Igsoong Roberts pagmoanhi na sa siyudad, ug iabiabi siya sa ngalan sa tabernakulo.

⁴⁵ Sa dili pa nato basahon ang mga Kasulatan, ako—gusto ko nga manindog kita sa makadiyut. Ug, sa walay tulunggon, kantahon lang nato ang usa ka koro o ang duha sa niining mahimayaon nga karaang himno sa iglesia, “My Faith Looks Up To Thee.” Sige, ang tanan magdungan na kanako karon, ug atong kantahon kini. Ug ayaw hunahunaa kung unsa kamo magkanta, basta kantaha lang kini alang sa kahimayaan sa Dios. Mahimo mo ba kaming pangunahan niini, Igsoong Neville?

My faith looks up to Thee,
Thou Lamb of Calvary,
Saviour divine;

Now hear me while I pray,
 Take all my guilt away,
 O let me from this day
 Be wholly Thine!

While life's dark maze I tread,
 And grief around me spread,
 Be Thou my Guide;
 Bid darkness turn to day,
 Wipe sorrow, fears away,
 Nor let me ever stray
 From Thee aside.

⁴⁶ Samtang nga nagduko ang atong mga ulo, gusto ko nga mobasa gikan sa balaan nga mga sinulat diha sa Biblia, sa San Mateo, sa ika-7 nga kapitulo, ika-13 ug ika-14 nga mga bersekulo. Ug hinaut nga igadugang sa Ginoo ang Iyang madagayaong mga panalangin samtang nga ginabasa nato Kini.

Sumulod kamo sa pultahan nga masigpit: kay haluag ang pultahan, ug halapad ang dalan, nga nagahatud ngadto sa mga pagkalaglag, ug daghan ang mga nagasulod agi niini:

Kay masigpit ang pultahan, ug hiktin ang dalan, nga nagahatud ngadto sa kinabuhi, ug diyutay ra ang mga nakatultol niini.

⁴⁷ Mag-ampo kita. Oh Dios, nga Mao ang nagbanhaw kang Ginoong Jesus gikan sa mga patay ug gikan sa lubnganan, ug nagpresenta Kaniya nganhi kanamo ning buntaga ingon nga usa ka buhi nga Halad, among mapainubsanon nga ginahalad na usab Kanimo ang among mga kinabuhi, sumala sa paghunahuna nga labi Kang mahunahunaon nganhi kanamo. Nga samtang nga mga makasasala pa kami kaniadto, patay tungod sa kasalanan ug mga kalapasan, Imong gipadala ang Imong bugtong nga Anak, nga gihimo diha sa porma sa makasasala nga unod, aron nga mamahimong usa ka halad pagpasig-uli tungod sa among mga sala, aron nga ang Walay Sala, nga nag-antus alang ngadto sa may sala, mahipasig-uli na usab kaming tanan diha sa pagpakig-fellowship Kanimo.

⁴⁸ Ug, Oh Dios, kung aduna may sala sa among taliwala karong buntaga, butang nga mababagan ang Balaang Espiritu sa paghatud kanamo sa Mensahe sa Dios nganha sa matag kasingkasing kanamo, nagaampo kami, nga mapainubsanon, Ginoo, nga pasayloon Mo kami sa among mga kalapasan. Hinloi kami pinaagi sa Dugo ni Ginoong Jesus. Kinsay... Nasayod kami, diha sa among mga kaugalingon, nga wala gyud kami, ug ginaangkon namo nga wala gyud kami. Apan Ikaw balaan man, Ikaw matuod, Ikaw ang pagkamatarung, Ikaw ang mismong Tuboran sa kalooy. Ug mapainubsanon kaming nagakamang dinha karon, ingon nga mga kalag nga nagahinulsol. Ug sa diha

nga bag-ohay lang gipahayag ang usa ka testimonyo, gikan sa Jamaica ug gikan sa Puerto Rico, ug kon diin Ikaw namuhat og ingon niadtong dagkung mga buhat, Oh Dios, kini na ang ilhanan sa nagasingabot nga Maong Matarung.

⁴⁹ Daw sa unsa Mo giluwat si Igsoong Evans gikan sa makamatay nga mga tango niadtong halasa, tungod kay usa siya ka magtotoo, ug ang Imong mga Pulong kanunay gayud nga matuod. Karon, Ginoo, luwasa kami gikan sa mga tango sa kamatayon niining buntaga, kon diin kami gipamaak ug gihiloan sa kaaway. Tugoti nga ang Imong nagaayong balsamo, ning buntaga, Ginoo, magatuhop sa among mga espiritu ug hinloan kami sa tanan namong dili-pagkamatarung. Ayoha ang balatian sa pisikal namong mga lawas nga gidaut sa mga gahum sa kaaway. Ang tanan nga anaa sa Balaan nga Presensiya, hinaut nga mangaayo sila.

⁵⁰ Magpakigsulti Ka kanamo pinaagi sa Imong sinulat nga Pulong, Ginoo. Wala ako nahibalo kung unsay igasulti, apan Ikaw niini ang magahatag. Ug pasidan-i kami, Ginoo, ug ipahiandam kami para sa Imong Pag-abot. Kay amo kining ginapangamuyo sa Ngalan ni Jesus ug alang Kaniya. Amen.

⁵¹ Medyo kanunay akong ulahi, tungod nga naghulat pa ako sa karon. Ug ang Sunday school, siguro, human na. Apan adunay usa ka butang bahin dinhi, pagmouli ako mabati ko gyud nga daw sa daghan ko'y oras. Kabalo na mo, pirme kita magdalidali, bisan pa. Mao nga, toohan lang nato ang Dios.

⁵² Ginahatag sa atong Ginoo kining estrikto nga pahimangno ngadto sa mga tawo sa Iyang henerasyon, mga tawo nga relihiyoso kaayo kaniadto. Ug miingon Siya, "Kay masigpit ang pultahan, ug hiktin ang dalan, nga nagahatud ngadto sa Kinabuhi, ug diyutay ra ang mga makatultol Niini." Karon, dili kadto tungod nga dili sila relihiyoso. Relihiyoso sila kaayo kaniadto. Ug tungod nga nagsalig sila sa iglesia ug sa kung unsa nga kredo ug mga denominasyon, ug nga nagtoo (kutob sa mahimo nila) sa Dios, nagdahum sila nga okey lang ang tanan. Apan Iya silang ginasultihan nga mamahimong diyutay ra lang ang makasulod.

⁵³ Ug nagahunahuna ako karong buntag kung dili kaha nga mahisama ko kadto nga henerasyon sa niini nga henerasyon. Kita n'yo, patapos na kadto nga dispensasyon para sa mga Judio, ug ginapahinungdan Niya balik kadtong nagkalainlaing uban pa niini ug ang nagkalainlain nga mga pagtapos sa maong nagkalainlain nga mga dispensasyon, ug ginasultihan sila nga ang mismong butang nga gihimo sa niadtong mga dispensasyon ginahimo na karon sa atubangan nila. Ug napakyas sila sa pag-ila niini. Ug tan-awon nato ang pipila sa maong mga butang nga Iyang ginahisgotan kaniadto.

⁵⁴ Sila, isip panig-ingnan, dili makatoo kaniadto nga ang Dios atua niadtong Tawhana. Pinakadaku kadto nga babag nga kinahanglan nilang paningkamotan nga malabang, kung unsa nga Siya ingon nga Tawo lang pero ginapaka-Dios ang Iyang Kaugalingon. Dili nila makita kung unsa nga ang Dios mahimong mopuyo sulod sa lawas sa tawo. Ug diha sa tanang mga kapanahonan, sa tanang mga panahon, kanunay nang nagpuyo ang Dios diha sa tawo. Instrumento sa Dios ang tawo. Sa kada henerasyon, ang Dios nagapakigsulti ngadto sa Iyang katawhan pinaagi sa mga ngabil sa tawo. Kanunay Siyang nagapili og usa ka tawo o usa ka magamit Niya.

⁵⁵ Ug ginatumbok Niya sila, ingon nga usa ka kapandolan gayud, kang Abraham. Ingon Niya, giingnan sila, “Kung inyong ginatawag ang inyong kaugalingon nga ‘mga anak ni Abraham,’ si Abraham nga inyong ‘amahan,’ nakita niya ang Akong adlaw ug nalipay nga makita kini. Si Abraham, nga propeta.” Ug walay duhaduha nga ang ginapahinungdan ni Jesus kanila nga napamatud-an na Niya kanila nga Siya mao ang Mesias, tungod kay ang ilhanan sa pagka-Mesias nagasunod Kaniya. Ug ingon niana na kini sukad pa sa matag henerasyon, nga ingon niana, ang ilhanan sa Mesias. Apan bisan pa niana sa pag-angkon Niya sa Iyang Kaugalingon nga Dios, nga mao ang Mesias Mismo, nakapandol kana kanila. Dili nila kini masabtan.

⁵⁶ Karon, sa diha nga si Abraham (nga gitawag nila nga ilang amahan) natagbo ang Dios, atua usab Siya diha sa pagka-lawas sa tawo, tungod kay mikaon Siya kaniadto og karne sa baka, mikaon og tinapay nga hinimo sa mais, ug miinom og gatas, ug mikaon og mantikilya, diha sa atubangan ni Abraham, ug bisan pa niana Siya Dios. Naila Siya ni Abraham, nga Dios, ug gitawag Siya nga “Elohim,” nga mao si Jehovah nga Makagagahum sa Tanan. Usa ka Tawo nga nakabisti, nga naabogan ang Iyang Lawas, ug milingkod didto ilalum sa usa ka kahoy, para malandongan, ug mikaon og karne ug miinom og gatas. Dayon kadtong mga walay kalooy, mabangis, hakog, nagpakamatarung nga mga Judio dili makatoo Kaniya ingon nga mao ang Anak sa Dios, ug gitawag pa si Abraham nga ilang amahan. Ug ginapahibalo Niya kanila nga mao sa gihapon nga mga butang ang ginabuhat Niya, diha sa Iyang pagkalawas sa tawo, nga gibuhat usab sa Dios kaniadto diha sa usa pa ka pagkalawas sa tawo niadtong natagbo Niya ang ilang amahan, si Abraham. Ug gitoohan kini ni Abraham. Ug dili sila makatoo niini.

⁵⁷ Nakita n’yo, sa diha nga nagalingkod kaniadto si Abraham ilalum sa iyang tolda tungod kay nagbuhat siya og usa ka pagdesisyon, ug kana nga pagdesisyon ginadala sa atubangan sa kada tawo nga natawo niining kalibutan. Ang kahoy sa maayo ug sa dautan nakapahimutang pirme sa atubangan sa kada tawo. Ug sa diha nga si Lot, ang iyang pag-umangkon, ug ang ilang mga magbalantay sa hayupan nagsugod pagbangi-bangi

mahitungod sa yuta; si Abraham, ingon nga usa ka matarung nga tawo, miingon kanila, “Wala na lang pagbangi-bangi sa taliwala kanato. Pumili ka lang kung asa ka nga direksyon paingon.” Nagaabot kana nga kahimtang sa kinabuhi sa kada magtotoo. Ug anaa kini sa inyong atubangan karong buntaga, ug anaa kini sa atubangan ko.

⁵⁸ Wala naghunahuna si Lot nga maga-backslide siya, apan milantaw siya kaniadto sa dalanon paingon sa Sodoma kon diin masayon ang mga butang. Ug daghang mga higayon nga nagalantaw kita paingon sa mga dalanon nga masayon. “Magpamiyembro ako niining usa—usa ka iglesia, ug, nakita n’yo, walay si kinsa man ang makasulti batok niini, tungod kay kini ang pinakadaku nga simbahan sa siyudad.” Ang masayon nga dalanon! Daghang mga higayon nga ginabuhat nato kana, ingon nga, sayup kita!

⁵⁹ Timan-i, kung mosunod mo kang Cristo, pagadumtan kamo sa mga tawo, kay ang tanan nga nagakinabuhi nga diosnon diha kang Cristo Jesus magaanus og mga paglutos. Ug kung moduol kamo kang Cristo, dili kamo moduol pinaagi sa kung unsa man nga iglesia o unsa man nga denominasyon, o unsa man nga kredo. Magaduol ka pinaagi sa Dugo, kana lang ang bugtong dalan sa pagsulod. Ug dili ka mahimong magdala og kauban, magaduol ka nga nag-inusara ug barugan ang kaugalingon mong pagpahayag ug kaugalingon mong pagtoo. Dili ka mahimong mosakay-sakay sa pastor, o sa pagtoo sa imong inahan. Magaadto ka ingon nga usa ka indibiduwal pagmoduol ka sa Dios! Ug daghang mga higayon nga ginabuhat nato ang binuang nga mga pagdesisyon.

⁶⁰ Unsa kaha kung si Lot, sa pagkakita niya nga masayon ang tanang . . . ? Nakita niya kon diin ang daghan nga kuwarta ug ang mamahimong inila, tungod kay mamahimo siya nga usa ka langyaw, ug usa ka maalam nga tawo, edukado, puno sa sikolohiya, ug makahimo siya sa kung unsa nga butang ug bisan pa niana mapapadayon niya ang iyang tinooan. Naghunahuna siya, “May pagtoo man ako sa Dios, busa moadto na lang ako sa Sodoma ug ako—makapanguwarta pa ako, ug mamahimo akong usa ka inila nga tawo, tingali usa ka batid nga magwawali.” Kita n’yo, aduna ka’y pagdesisyon nga pagabuhaton.

⁶¹ Ug ang ordinaryong mga tawo adunay pagdesisyon nga pagabuhaton. “Moadto ako didto sa ingon niini nga iglesia. Oh, ang tanan nga tawo sa siyudad nagahunahuna nga kini na ang pinakamaayo gayud! Aba, ang mayor sa siyudad miyembro sa niini nga iglesia.” Karon, mahimong miyembro lagi siya sa usa ka iglesia nga tinuod nga maayo gayud, apan kinahanglan mo sa gihapon itaral kana nga iglesia ug ang mga miyembro niini pinaagi sa Kasulatan. Usahay nagaanha sila tungod kay kini ang popular na nga paagi, ang—ang mga tawo nga mas maayo mamisti nagaadto sa mga ingon niana nga mga lugar. Ug dinha

nato ginabuhat ang usa—usa ka grabe nga kasaypanan. Karon himatikdi kini.

⁶² Ug si Abraham, ang butang lamang nga mahimo niya mao ang pagdawat sa ikaduha na lang nga pilianan. Ug usahay mas maayo pa ang ikaduha nga pilianan kay sa nahauna, kung nahimo kini sa ingon niana. Himatikdi, wala magdugay, sa diha nga nakita niya ang maong dakung siyudad, wala niya niadto nakita ang iyang asawa nga mamahimong usa ka haligi nga asin, sa gihapon, wala niya nakita ang kalayo nga magasunog sa mao nga siyudad. Apan gipili ni Abraham ang dalanon sa mga pipila nga gitamay. Nagpabilin siya didto sa mga desierto.

⁶³ Ug, bisan pa, unsa kaha kung miingon si Sarah. . . Karon hinumdumi, si Sarah kaniadto ang pinakamatahum nga babaye sa tibuok nga yuta. Wala na’y babaye nga ingon ka matahum sama kang Sarah. Ang tanan, nga nakakita kaniya, nahigugma kaniya. Karon, daw sa unsa ka sayon unta kang Sarah kaniadto nga buhaton kadto nga matang sa pagdesisyon. Apan nagdesisyon siya nga magpabilin uban kang Abraham.

⁶⁴ Oh, mga kababayen-an, ayaw tugoti ang Yawa nga butahan kamo, ingon nga mamahimong popular ug magpamiyembro sa *niini* ug *niana*. Magpabilin kamo kang Cristo! Kay, haduol na ang takna, paduol na ang dakung pagkagun-ob, nga mas grabe pa kay sa Sodoma ug Gomorra kaniadto, para niini nga nasud. Mas maayo-ayo pa ang Sodoma ug Gomorra kay niini.

⁶⁵ Karon, sa diha nga gidawat ni Abraham ang dalanon nga gihatag sa Dios kaniya, ug anaa kaniya ang dili-matambok nga bahin sa yuta, dili gayud siya magauswag. Apan bisan pa niana nahibalo siya sa usa ka butang, nag-alagad siya sa Dios ug nagtoo siya sa Dios.

⁶⁶ Mao nga usa ka adlaw adunay miabot nga tulo ka lalaki, ug puno gyud sila sa abog ug gipangkapoy, ug nalooy si Abraham kanila, miingon siya, “Ari sâ mo ug paglingkod mo sa makadali ilalum dinhi sa kahoy’ng encina.” Ug samtang nga nagatindog siya didto nga nagapakigsulti kanila, naila niya nga wala siya nagapakigsulti sa ordinaryo lamang nga mga tawo. Sa ilang pagpanulti, lahi gyud sila. Ug miadto si Abraham ug nagpaihaw og usa ka nating baka ug gipaluto kini, ug gipabuhat si Sarah og tinapay ug gipaandam aron nga pakaonon sila.

⁶⁷ Karon hinumdumi, mga Manolunda ang duha kanila, mga Manolunda nga anaa sa tawhanong lawas, ug ang usa kanila mao ang Dios Mismo. Ug ang Usa nga mao ang Dios nakatalikod sa tolda.

⁶⁸ Ug si Sarah kaniadto nagpabilin sulod sa tolda. Gusto ko nga makita ang usa ka babaye nga nagapabilin sa iyang puwesto nga ingon niana, dili nga nagagawas ug ginasultihan ang iyang bana kung unsay buhaton, ug sa matag higayon nga adunay tawo. Apan nagpabilin siya sulod sa tolda. Sa walay pagduhaduha,

tingali nga nagapanghugas sa mga gikan-an o ginabuhat ang kung unsa man.

⁶⁹ Ug kining Usa Nga mao ang Dios, sige Siyang nagalantaw ngadto sa Sodoma, ug gisultihan Niya sila kung unsay Iyang pagabuhaton. Ug miadto didto ang duha ka Manolunda aron iwali ang Maayong Balita. Apan ang Usa mipabilin didto, kadto ang Usa nga mao ang Dios, ug miingon Siya, “Dili Ko igatago kang Abraham ang mga tinago nga nahibaloan Ko, tungod kay siya ang manununod sa kalibutan.”

⁷⁰ Oh, aduna kita og usa ka katungod niining buntaga, iglesia, nga mahibaloan ang mga tinago mahitungod sa Pag-abot sa Ginoo. Kay, “Bulahan ang mga makigdaiton, pagatawgon sila nga mga anak sa Dios. Bulahan ang mga gigutom ug giuhaw, sila pagabusgon. Bulahan ang mga maputli og kasingkasing, kay makakita sila sa Dios. Bulahan ang mga maaghop, kay sila magapanunod sa yuta.” Kon ingon-ana, kung ang iglesia sa buhing Dios magapanunod sa yuta, walay mga tinago nga ililong gikan kaniya.

⁷¹ “Ang tanan nga gisulti sa Amahan Kanako, gisulti Ko usab kaninyo,” ang giingon ni Jesus. Ug dili sila makatoo Kaniya.

⁷² Busa sa mga adlaw ni Abraham, sama sa Iyang ginapahinungod kanila kaniadto, miingon Siya nga samtang nga si Abraham nagapakigsulti sa maong Manolunda, ug nga nakatalikod Kini sa tolda, ug gisultihan Niya si Abraham nga Iya siyang pagaduawon pinaagi sa usa ka anak. Ug si Sarah, nga atua sulod sa tolda, mikatawa. Ug miingon Siya, “Nganong mikatawa man si Sarah?” Unsa ba ang Iyang ginapakita kaniadto? “Nganong mikatawa man si Sarah?” Pipila na lang ka oras kadto sa dili pa ang pagkagun-ob, sa diha nga nahitabo kadto. Sa wala pa ang pagkagun-ob, kadtong kalayo nga miabot gikan sa langit ug misunog sa maong siyudad, ug gibuhat usâ kadto nga ilhanan.

⁷³ Ug miingon si Jesus, “Nangasayup kamo,” ngadto sa bantugan nga mga doktor sa dibinidad, ngadto sa usa ka relihiyosong nasud kon diin literal nga minilyon ang mga magtotoo. Miingon Siya, “Nangasayup kamo, kay wala ninyo hibalo ang mga Kasulatan bisan ang Gahum sa Dios.” Sa usa ka henerasyon nga sama kaniadto, nga mga tawong hanas kaayo, nga mga iskolar ug mga gipadaku sulod sa iglesia. Sa diha nga matawo ang usa ka bata kaniadto, panag-iya na kini sa iglesia. Kinahanglan nga mamahimo kang usa ka Israelinhon. Human sa walo ka adlaw nga matawo ka, mao ang pagcircuncion, ug mao nga usa ikaw ka Israelinhon sa sugod pa lang. Ug ang pagkasacerdote nagagikan sa mga Levita, nga mga binansay diha sa mga Kasulatan sulod sa ginatus ka mga katuigan. Miingon si Jesus bisan pa niana, “Nangasayup kamo, kay wala ninyo hibalo ang mga Kasulatan!” Nahibalo sila niini diha

sa kaugalingon nilang libro sa kahibalo, nahibaloan nila kini pinaagi sa ilang mga katekismo, nahibaloan nila kini pinaagi sa kaugalingon nilang teolohiya. Apan miingon si Jesus, “Wala kamo mahibalo Niini, ang mga Kasulatan, wala kamo mahibalo bisan sa Gahum sa Dios. Kung nakaila kamo kang Abraham, nakaila unta kamo Kanako. Kung mga anak kamo ni Abraham, nakaila unta kamo Kanako, tungod kay nalipay si Abraham niadtong nakita niya ang Akong adlaw, kay nakita na niya daan ang mao nga adlaw. Sa diha nga nagatindog Ako sa iyang atubangan kaniadto, diha sa usa ka tawhanong lawas, ug gipangbuhat kini, nakaila siya nga Ako kadto, ug gitawag niya Ako nga ‘Elohim.’ Apan ania Ako nga ginabuhay ang mao rang butang sa atubangan ninyo, ug ginatawag ninyo Ako nga ‘Beelzebub.’”

“Oh,” moingon sila, “Amahan man namo si Abraham.”

“Ginatawag n’yo si Abraham nga inyong ‘amahan?’”

⁷⁴ Miingon kini, “Aba, kami, mga miyembro kami sa iglesia. Usa kami ka relihiyosong nasud. Halangdon kami nga mga tawo. Mga tawo kami sa Dios!”

Miingon si Jesus, “Kamo’y mga Yawa, siya mao ang inyong amahan.”

⁷⁵ Mahisama ko kadto nga henerasyon sa niining usa karon. Sa karon, nga adunay literal nga minilyon ka mga tawo ang nagaangkon sa pagka-Cristohanon, ug wala man gyu’y nahibaloan mahitungod sa Dios sama sa Hottentot nga walay nahibaloan mahitungod sa kabalyerong Egiptohanon. Adunay mga kalalaken-an ug mga kababayan-an sa karon, literal nga minilyon ang nagapamahayag nga mga Cristohanon nga nagaangkon kang Cristo, nga wala nahibalo sa nahaunang prinsipyo sa Gahum sa Iyang pagkabanhaw, ug wala gayud nakaambit sa Iyang kaayo. Wala pa gayud nila nabati ang Iyang Gahum. Nabutahan ang ilang mga mata ngadto sa Kamatuoran.

⁷⁶ Miingon, “Mga buta kamo, nga magtotultol sa mga buta. Dili ba . . . ang . . . kung ang buta nagatultol sa buta, dili ba nga pareho silang mangahulog sa gahong?”

⁷⁷ Dayon naghunahuna sila, “Mga Cristohanon man kami. Mga magtotoo kami. Mga miyembro kami sa pinakahataas nga mga iglesia nga aduna karon. Ang among mga rabbi sila mao ang pinakamaayong pagkahanas nga mga iskolar.” Ug bisan pa niana gipang-ingnan sila ni Jesus nga wala man lang sila’y nahibaloan sa mga Kasulatan.

⁷⁸ Nakita n’yo kung unsa nga gililong kini sa Dios gikan sa mga mata sa mga maalam ug mga masinabuton, ug gipadayag kini ngadto sa mga bata nga makakat-on? Oh, ang pagkadaku nga Gahum ug pagkawalay-kinutoban sa Dios! Pagkamaayo Niya gayud ngadto sa mga nagatinguha nga magkinabuhi

nga matarung sa Iyang atubangan! Wala Siya’y igadumili nga maayong butang.

⁷⁹ Ug ang makita ang adlaw sa diha nga ang atong nasud, ang atong kalibutan, nadaut na sa mao rang butang!

⁸⁰ Gusto ni Jesus nga tul-iron sila sa husto. Miingon sila, “Oh, amahan namo si Abraham. Ug maatua man kami sa Himaya, ayaw kamo magkabalaka bahin niana, tungod kay nagatoo man kami sa Dios. Kami nagapamahayag, ug kami nagatoo sa Dios, ug among ginatudloan ang among mga tawo. Ug kinsa Ka nga moanhi nga nagadala sa—sa sa kung unsa nga ilhanan ug paninguhaon nga tawgon kini nga Dios? Ikaw walay lain kondili usa ka Beelzebub.” Mao na kana, aduna na sila og ilang mga kredo ug ilang denominasyon.

Giingnan sila ni Jesus, “Yawa kamo.” Hunahunaa gyud kini!

⁸¹ Ug gusto kong ihisama kadto nga henerasyon sa niini dinhi, sa karon kon diin aduna na’y minilyon ang nagapamiyembro og mga iglesia, aduna na og linibo. Ug mikanaug ang Dios aron magpuyo diha sa Iyang iglesia pag-usab, ug buhaton ang mao rang mga butang nga Iyang gibuhat kaniadto, aron himoon nga ang Iyang Kaugalingon mao ra sa gihapon kagahapon, karon, ug hangtud sa kahangturan. Ug ginatalikdan kini sa mga tawo, kanunay, ang uban aron nga mamahimong inila, ang uban usab aron nga makalikay sa pagdesisyon. Ginapugos kini ngadto sa mga tawo! Kinahanglan nga magdesisyon ka. Dili ka puede mamahimong niyutral. Kinahanglan magsulti ka og “oo” o “dili.” Dili ka mobiya nianang pultahan nga mao ra sa gihapon nga tawo niadtong pagsulod mo. Dili mo mahimo kini. Aduna ka’y pagdesisyon nga kinahanglan mong buhaton. Buhata kini ning buntaga para kang Cristo.

⁸² Abi nila nga ang tanan nga nahisakop sa iglesia maluwas. Nag-ingon si Jesus, “Masigpit ang pultahan, ug hiktin ang dalan, ug apan diyutay ra ang mga makatultol niini.”

⁸³ Tugoti kong pahimangnoan kamo karong buntaga, iglesia, magmaampingon kamo. Nagakahitabo na kini karon, diha sa atong pagpakamatarung sa kaugalingon, kamasinaligon diha sa kaugalingon nga henerasyon sa kasaling-kapaw nga atong gikapuy-an. Usa ka panahon kon diin ang mga kalalaken-an ug mga kababayen-an manindog diha sulod sa mga simbahan ug diha sa mga bangko niini, ug manganta sa mga alawiton sa Dios, ug mogawas niana nga simbahan ug manigarilyo, ug moinum og whiskey, ug moadto sa mga sayawan, ug—ug magkinabuhi para sa kalibutan, ug mag-estorya og mga mahugaw, malaway nga mga panistis, ug tawgon ang ilang mga kaugalingon “mga Cristohanon.” Sa diha nga ang mga kalalaken-an ug mga kababayen-an mahimo nila ang molakaw gikan sa pulpito o gikan sa simbahan, ug gikan sa maong lugar sa Gahum sa pagkabanhaw, kon diin nga kanang mao ra nga ilhanan nga iya

sa Mesias nagalihok sa taliwala nila, ug dili pa mamahimong mga bag-ong linalang diha kang Cristo, aduna gayud sa kung unsa nga sayup. Sa diha nga ginamantala kini sa mga mantalaan; ug gikan sa baybayon ngadto sa mga kabaybayonan, nga paanhi-paadto, gikan sa mga nagyelo nga mga rehiyon didto sa Amihanang ngadto sa tropikong kalasangan didto sa Kasadpan, ginapadala kini sa Dios, ug kanunay kining ginatalikdan sa mga tawo. Kung ingon-ana unsa ma'y atong masulti, unsa ma'y atong mahimo? Balik ta sa mga Kasulatan kon diin Siya nag-ingon, "Kay masigpit ang pultahan, ug hiktin ang dalan, ug diyutay ra lang ang mga makatultol niini."

⁸⁴ Miingon Siya, "Maingon sa nahitabo kaniadto sa mga adlaw ni Noe, maingon man usab sa Pag-abot sa Anak sa tawo." Paminaw, niadtong mga adlaw ni Noe, gipuy-an sa mga tawo ang kalibutan kaniadto nga daw sama niining sa karon. Ang ilang siyensya kaniadto mas labaw kay sa atong siyensya. Nanagtukod sila og mga sphinx ug mga piramide ug naghimo og mga butang nga dili nato arang mahimo sa karon. Usa ka mas labaw, bantugan, maalamon nga mga tawo. Ug hinumdumi, nagaingon ang siyensya sa karon, "Usa na lang ka minuto sa dili pa ang tungang gabii." Usa na lang ka minuto sa dili pa moabot ang orasan ngadto sa kahalawum sa maong takna. Mas haduol na kini kay sa pagdahum nato. Nagalaum ako nga—nagasalig nga ipatuhop kini sa Balaang Espiritu ngadto sa kasingkasing sa matag magtotoo, "Maingon sa nahitabo kaniadto sa mga adlaw ni Noe"!

⁸⁵ Pila ba ang naluwas niadtong mga adlaw ni Noe, gikan niadtong henerasyon? Walo, walo ra gikan sa mga minilyon kaniadto. Miingon Siya, "maingon man usab sa Pag-abot sa Anak sa tawo."

⁸⁶ "Ug maingon sa nahitabo kaniadto sa mga adlaw sa Sodoma, maingon man usab sa Pag-abot sa Anak sa tawo." Gikan sa mga linibo, tulo ra ang naluwas.

⁸⁷ Dayon moingon mo kanako, "Magwawali, naunsa na man kadtong tanang linibo nga magauban Kaniya?" Karon, igsoon, naglangkub kana sa daghan nga mga nangaging henerasyon.

⁸⁸ Makurat ako kung may usa ka dosena ang makakuyog gikan sa niining henerasyon. "Masigpit ang pultahan, ug hiktin ang dalan, ug apan diyutay ra ang mga makatultol niini."

⁸⁹ Oh, nahibalo ako sa mga iglesia, kung unsay ilang isulti, "Kung isulat mo ang imong ngalan diha sa libro ug mahimo ka na nga usa ka miyembro, *niini*, okey ka na." Walay ingon niana nga Kasulatan nga sama niana. Kung ang tanan nga nagsulat sa ilang ngalan sa libro, ug sa—sa iglesia, magkaaduna unta og binilyon ka binilyon ka pilo, nga ang tanan na niini makasulod. Kung ingon-ana ang tanan na nga matang sa espiritu mamaatua

didto, ug unsa na kaha nga matang sa kahimtang ang madangtan sa Langit? Hunahunaa kini karon.

⁹⁰ Sama sa ingnon sa usa ka tawo kanako, “Kadali lang, Igsoong Branham. Si *Ingon-ani ug si ingon-ana*, nadungog ko silang nagsulti sa laing mga dila, nahibalo ako nga makasulod sila.”

⁹¹ Bisan pa wala kana nagapasabot nga makasulod sila. Si Pablo nag-ingon, diha sa Unang Mga Taga-Corinto 13, “Kon ako magsulti’g mga dila sa mga tawo ug sa mga manolunda, ug walay gugma, wala ako’y kapuslanan.”

⁹² “Oh, miadto ako sa panagtigum ni *Ingon-ani ug ni ingon-ana*. Oh, namuhat siya og dagku, gamhanang mga buhat. Nakita ko siya nga gibuksan ang panan-aw sa buta.”

⁹³ Mahimo siyang malaglag sa gihapon. “Daghan ang magaduol Kanako nianang adlaw ug magaingon, ‘Ginoo, dili ba nagwali man ako sa Imong Ngalan, nagpropeya? Dili ba, sa Imong Ngalan, nagpagula ako og mga espiritu sa yawa? Dili ba, sa Imong Ngalan, daghan ang nabuhat ko nga dagkung mga buhat?’ Magaingon Siya, ‘Pahalayo kamo Kanako, kamong mga mamumuhat sa kadautan, wala gani Ako makaila kaninyo.’” “Masigpit ang pultahan, ug hiktin ang dalan, ug apan diyutay ra ang mga makatultol niini.”

⁹⁴ Tugoti nga hatagan ko kamo og pipila ka pagbanabana nga magatay-og kaninyo. Sumala sa siyensya sa medisina, didto sa siyudad sa Chicago, sumala sa estadistika sa mga doctor, nga adunay traynta ka libo ka mga kaso sa aborsyon didto sa Chicago pa lang, sulod sa traynta ka adlaw, nga ginapahigayon sa mga doctor. Unsa kaha ka daghan sa niining gagmay’ng mga pildoras ug ingon-anang mga butang ang ilang ginainom, sa maong mga kaso sa aborsyon?

⁹⁵ Ginapakita sa estadistika, sa Estados Unidos, nga adunay mas daghan natawo nga mga anak sa gawas kay sa mga anak nga natawo sa sagradong kasal. Kahibalo ba mo nga ang Biblia nag-ingon, diha sa Deuteronomio 14:2, nga “ang usa ka anak sa gawas, nagkinahanglan og upat ka gatus ka tuig aron kini mawala”? Ang anak sa anak sa anak sa anak sa ilang mga anak dili mahimong mobarug sa kongregasyon sa Ginoo, sa upat ka gatus ka tuig, sulod sa napulo ka henerasyon. Adunay kuwarenta ka tuig diha sa usa ka henerasyon. Ang ilang kaapo-apo-apo-apo-apo-apo-apohan usa kaniadto ka anak sa gawas, dili siya apil sa esena! Karon unsa na? Ipakita kanako kung asa kini nausab.

⁹⁶ Unsa na’y atong nadangtan? Ug karon ang anak sa gawas, tungod sa mga pagpanapaw, ug sa makasasala nga mga kababayan-an nga nanagbisti na diha sa kadalanan nga sama sa lalaki, nga usa ka dulumtanan sa atubangan sa Dios, mga nagapanigarilyo, nagapanginom og whiskey, nagaangkon nga

mga Cristohanon kono. Dili unta tugotan sa Dios ang maong pundok sa mga bigaon! Husto kana. Dayon tawgon ang ilang mga kaugalingon nga mga Cristohanon? Mao diay nga nag-ingon si Jesus, “Masigpit ang pultahan, ug hiktin ang dalan, ug diyutay ra lamang ang mga makatultol niini.”

⁹⁷ Ayaw nila ipaubos ang ilang mga kaugalingon. Mga pormal na sila. Tan-awa, sa dihang gisultihan si David sa iyang kasal-anan nga nahimo, naghinulsol siya dayon, ug gihigugma siya sa Dios tungod niini. Sultihan mo sila sa ilang mga kasal-anan, moingon sila, “Dili na gayud ako mobalik pa dinhi.” Ngano man? Aduna man sila’y daghan pa nga maadtoan nga mga lugar, mahimo silang moadto nianang ilehitimo nga mga lugar nga okey ra ang mga ingon nianang mga butang. Apan panahon na nga isul-ob sa mga magwawali ang bug-os nga hinagiban sa Dios ug iwali ang Pulong nga walay pagpakig-kompromiso, ang Maayong Balita. Kinahanglan nga ang mga tawo magpaubos sa ilang mga kaugalingon.

⁹⁸ Wala na’y pagka-sinsero sa taliwala sa mga Cristohanon. Gusto nilang isulti nga, “Usa ako ka Methodist, usa ako ka Baptist, usa ako ka Pentecostal,” wala kana nagapasabot og [Ginapapiti ni Igsoong Branham ang iyang mga tudlo—Ed.] *ingon niana sa Dios.*

⁹⁹ “Nagsulti ako sa laing mga dila, nagbuhat ako og mga milagro.” Mao kana ang bug-os natong ginapatigbabaw, sa dihang mao kana ang usa sa pinaka-makapabuta nga mga butang nga mahimo nila. Oo. Nagakahulog ang ulan sa mga matarung nga mao man usab sa mga dili-matarung. Ginabisbisan sa ulan ang mga pananum maingon man usab nga ginabisbisan niini ang mga sagbot, Roy. Ang mao rang ulan, ang mao rang Balaan nga Espiritu nga nagakunsad sa mga tawo. Wala kana sa gihapon nagapasabot . . . Kinahanglan nga mausab ang ilang kinaiya, gikan sa kinasuloran pagawas. Dili nga pang-gawas lamang nga pagpadayag o pagpakita, kondili ang Espiritu sa buhing Dios nga anaa diha sa sulod nga nagapahimo nianang tawhana nga usa ka bag-o na nga linalang, nga ginapaubos ang kasingkasing sa maong lalaki o sa maong babaye ngadto sa atubangan sa Dios.

¹⁰⁰ Moingon ka, “Magwawali, buot mo bang ipasabot kanako nga moduhaduha ka pa bisan sa usa ka dosena gikan niining minilyon ug upat ka bilyon nga tawo sa kalibutan?” Nagaduhaduha gyud ako kung aduna kaha og usa ka dosena nga mahiuban sa Pagsagaw. Hunahunaa ninyo kini! Ginasulti ko kaninyo kung unsa ang giingon ni Jesus dinhi sa Maayong Balita. Hunahunaa ninyo kini!

¹⁰¹ Unsa ma’y nadangtan niini? Tungod nga nakasulod ang imoralidad sa taliwala sa mga tawo, misugod na nga matawo ang mga anak sa gawas, kadto ang nagpapanas kanila. Kita

n'yo, mahimo kitang magpabilin dinhi sulod sa pipila ka oras, sa pagpaklaro nianang mga butanga, ug makita ninyo nga nanagpuyo kita sa usa ka dautan, salawayon, dunot na sa kinauyokan niini nga henerasyon sa mga tawo. Dili ikatingala nga wala sila'y makita nga mga ilhanan, dili ikatingala nga dili na sila maminaw sa Maayong Balita, magahi na sila, pero mga ingon ka relihiyoso ug ingon ka diosnon.

¹⁰² Dili ba nag-ingon si Jesus nga, “Ang Espiritu sa tinaw nagapahayag, nga sa ulahing mga panahon mamahimo silang mga gahi'g-ulo, hambugiro, mga mahigugmaon sa kalingawan labi kay sa paghigugma sa Dios, dili-malukmay, dili mapugnganon, mapintas, ug dili mahigugmaon sa maayo, nga nagabaton sa dagway sa pagkadiosnon”? Kita n'yo? Oh, makasinggit ka, sigurado. Makasulti ka sa laing mga dila, sigurado. Ang pagtoo makapagula og mga yawa, sigurado. Apan dili ingon niana ang atong ginahisgotan.

¹⁰³ Dayon mosulti ka kanako, “Igsoong Branham, unsa man diay ang timailhan sa usa ka Cristohanon? Kinsa man diay ang maluwas? Ikaw kaha, Igsoong Branham?” Ginasalig ko kana sa Dios. Wala ko kabalo. Nagatoo ako nga luwas ako. Ginatandi ko ang akong kinabuhi, adlaw-adlaw, diha sa Pulong. Kung wala kini nagasubay sa niining Pulong, kung ingon-ana aduna sa kung unsa nga sayup, kinahanglan kong mobalik didto ug mahitul-id.

¹⁰⁴ “Bueno,” moingon, “Igsoong Branham, pagnagasulti ang mga tawo sa laing mga dila, wala pa ba diay kana nagapasabot nga luwas sila?” Wala, sir! Dili, gayud! Nakadungog na ako og mga balbal ug mga abat nga nagasulti diha sa laing mga dila, tanan na nga mga matang sa binuang. Nakakita na ako og mga tawong nagasulti sa laing mga dila ug ginapuyo-puyo ang asawa sa ubang lalaki. Nakakita na ako og mga tawong nagasulti sa laing mga dila, ug nagalukso-lukso ug nagasinggit sama nga daw sa nasunog ang balay, ug mogawas ug makigtigayon og baliko'g mga transaksyon, ug mangawat, mamakak, ug tanan na. Unsa ma'y inyong mapaabot niini? Wala, sir.

¹⁰⁵ Miyembro sa iglesia, mga diakono sa iglesia, mga diosnon gayud. Aba, abi n'yo mopalit sila og gasolina pag-Dominggo? Dili. Apan pag-Lunes nagahimo og butang nga mahugaw ug dautan ug salawayon. Nagapuyo ang Dios sulod sa kasingkasing, dili sa pang-gawas, butang kini nga nagagikan sa kasingkasing.

¹⁰⁶ “Masigpit ang pultahan, ug hiktin ang dalan, ug apan diyutay ra lamang ang mga makatultol niini.” Sama sa nahitabo kaniadto sa mga adlaw ni Noe, nga walo gikan sa minilyon kaniadto; sama sa nahitabo kaniadto sa mga adlaw sa Sodoma, nga tulo ra gikan sa minilyon; maingon usab kini sa pag-abot sa Anak sa tawo.

107 Ug makita ninyo ang kadautan nga gikahimutangan nato. Makita ninyo kung unsa nga ang matag imahinasyon, sa tawo, mogawas siya didto ug patindogon sa Yawa ang maalam nga mga magwawali diha sa pulpito ug tugotan ang mga tawo nga makalusot niini.

108 Usa ka tawo ang miingon sa miaging adlaw, “Dili ta ka patindogon sa akong pulpito, buangon mo lang ang mga kababayan-an ko.” Dili, ingon na niana sila daan. Igabalik sila Niini sa ilang hustong panghunahuna, sultihan sila nga undangon na sa pagsul-ob kini nga mga sinina ug ingon-anang mga butang. Ug, bueno, kinahanglan aduna gyu’y mobuhat niini.

109 Giingnan ko ang akong asawa, “Nabuang na ba ako, ako mismo? Buangbuang na kaha ako? O, unsa na’y nahitabo kanako?” Aduna gyu’y butang sa sulod nga dili mahimong pugngan. Kinahanglan ko nga isulti Kini, wala ko’y labot kung unsa may isulti ni kinsa man.

110 Moingon, “Pagadauton mo lang ang imong ministerio.” Bueno, ang unsa man nga ministerio nga pagadauton sa Maayong Balita, angay lang nga madaut.

Hinaut nga hatagan kita sa Dios og kaisug nga barugan kung unsay Kamatuoran ug isulti ang Kamatuoran bahin niini! Kasalanan kini, usa ka kaulawan!

111 “Masigpit ang pultahan,” ang giingon ni Jesus, “ug hiktin ang dalan.” Ug kamo nga nagadahum nga minilyon, ug nga tanan kamong mga Methodist, mga Baptist, Presbyterian, mga Pentecostal ang makasulod, maulawan kamo nianang adlaw. Nag-ingon si Jesus, “Daghan ang mangduol ug manglingkod didto sa Ginghamian, moingon, ‘aduna ko’y katungod nga maania dinhi.’” Miingon Siya, “Apan papahawaon sila sa mga anak sa Ginghamian. Magkaaduna og mga paghilak ug pagdangyunguy ug pagkagot sa mga ngipon.” Mas maayo pa nga mag-imbentaryo ka na karong buntaga, Cristohanon. Magkaaduna og napulo ka minilyon ka binilyon ka pilo nga nagaangkon nga mga Cristohanon, ug mga nagmatinuoron gyud sa ilang kinabuhi, ang dili makasulod sa mao nga pultahan. Mao kana ang giingon ni Jesus.

“Pila man diay ang makasulod?”

112 Wala ko kahibalo kung pila kaha ang makasulod. Ang bugtong butang lang mao’y, “Dios, tugoti ako nga mamahimong usa kanila!” Mao kana. Siya ang Maghuhukom. “Tugoti ako nga mamahimong usa niini.”

113 Moingon ka, “Igsoong Branham, unsaon mo man pagkahibalo kung ang usa ka tawo Cristohanon?”

114 Wala ko kabalo. Apan sultihan ko kamo kung unsa ang ginasulti sa Kasulatan. Siguradong toohan ninyo Kana.

Niadtong gipadala ang Espiritu Santo sa yuta, nakigsulti ang Dios pinaagi sa Espiritu Santo. Nagsugo Siya og usa ka manolunda kaniadto—kaniadto, usâ. Ug miingon Siya, “Lumakaw ka latas sa taliwala sa siyudad ug ngadto sa mga tawo, ug ibutang ang usa ka timaan diha sa ilang mga agtang, sa kadtong mga nagapanghupaw ug nagatiyabaw tungod sa mga dulumtanan, nga ginatul-id kadtong mga butanga.”

¹¹⁵ Unsa man diay ang dulumtanan? Usa ka babaye nga nagasul-ob og bisti nga iya sa lalaki. Ginapasuka niini ang Dios. Nakaadto na ba mo sa kon diin may butang nga dulumtanan? Daw sa unsa nga ginapasuka ka niini! Dili mo kini maagwanta. Ang babaye nga magsul-ob og bisti nga iya sa lalaki, ingon niana niya ginapaluod ang Dios; mahimong nagakanta ka sa choir, mahimong nagaampo ka adlaw-adlaw, ug nagasinggit adlaw-adlaw, o nagakinabuhi alang sa Dios adlaw-adlaw, kondenado ka sa Presensiya sa Dios. Eksaktong ingon niana ang ginasulti sa Kasulatan. “Usa ka dulumtanan!” Ug kadtong mga nagatugot niana magkaadunay bahin sa ingon niana.

¹¹⁶ Hinaut nga hatagan kita sa Dios og grasya sa pagbarug batok sa mga ingon niana. Kung kinahanglan mong magbarug nga nag-inusara, pagbarug dinha ug kupti ang Pulong sa Dios sa imong kamot. Dili gayud Kini mapakyas.

¹¹⁷ Karon midangat na kita sa usa ka panahon, kon diin, ang dulumtanan gayud nga ginahimo sa mga tawo. Ug migawas na ang Manolunda nga nagapangselyo na usab. Pangitai ko ninyo og usa ka tawo sa Jeffersonville, kung gusto ninyo mahibaloan kung kinsa gayud ang makasulod, pangitai ko ninyo og usa ka tawo dinhi sa atong siyudad nga nagapanghupaw ug nagatiyabaw, padayon nga nabalaka ug nahingawa, ug nagaampo tungod sa mga dulumtanan nga mga butang nga nagakahitabo sa siyudad. Mahimo n’yo bang itaas ang inyong kamot ug itudlo kini nga tawo? Kung ingon-ana dawata kini nga Kasulatan, “Masigpit ang pultahan, ug hiktin ang dalan, nga nagahatud ngadto sa Kinabuhi, diyutay ra lang ang mga makatultol niini.” Kadto lamang sila ang pagaselyohan.

¹¹⁸ Oh, mapakita ko sa inyo nga daghan ang nagasimba. Mapakita ko sa inyo nga daghan ang nagakanta sa choir. Mapakita ko sa inyo nga daghan ang nagatudlo og Sunday school. Mapakita ko sa inyo nga daghan ang mga pangulo sa—sa halangdong mga katilingban. Mapakita ko sa inyo nga daghan ang nagasinggit, daghan ang nagasulti og laing mga dila, daghan ang nagapamuhat diha sa mga buluhaton alang sa Maayong Balita.

¹¹⁹ Apan pakitai ko ninyo og usa nga dinha sa kinasuloran sa ilang kasingkasing nagkabalaka gayud og ayo sa mga kasalanan sa kalibutan! Pakitai ko ninyo og usa ka magwawali nga mahimong mobarug sa karong panahon ug kondenahon kini

nga mga denominasyon. Pakitai ko og usa ka magwawali nga magabarug ug isulti ang maong mga butang, ug kondenahon kini nga mga denominasyon. Maayo pa nga dili niya kini buhaton, pagapalagputon gayud siya, kana pa ra ba ang iyang ginakuhaan og paginabuhian.

¹²⁰ Dili ikatingala nga giingnan ni Billy Graham si Jack Moore, ang ingon nga, dili niya masabtan kung unsa nga nagapadayon sa gihapon ang akong mga panagtigum, miingon, “Dili man siya Baptist, dili man usab siya Methodist o Pentecostal.” Ang ingon, “Ug tanan sila nga batok kaniya.” Oo, wala ako nagasulti nga. . . Ang hinungdan mao nga gisulti ko, dili ko masulti kini sa publiko. Ginasulti ko kini sa kaugalingon kong iglesia. Aduna ko karon og pagpakigbisog, tungod kay ania na kanako ang oras sa pagsulay.

¹²¹ Nagaingon sila, “Kung moanhi ka, okey lang, apan ayaw gayud pagsulti og unsa man bahin Niana.” Mas maayo pa nga dili ka na lang mag-usik-usik og laway.

¹²² Igawali ko kung unsay gisulti sa Dios nga iwali! Husto kana. Ang usa sa nianang walo aduna lang sa kung asa man. Anaa lang sa kung asa man ang usa kanila. Apan sa nianang adlaw dili ko gusto makasala sa pag-ingon nga nakigkompromiso ako tungod sa kung unsa nga kredo o sa usa ka doktrina sa iglesia, o sa kung unsa nga denominasyon. Giwali ko ang Kamatuoran!

¹²³ Nagaingon sila, “Nganong dili ka, ngano man nga ang imong ministerio, Igsoong Branham, nga daw sa daku man kaayo, nganong wala man kini nagakaylap sama sa ginabuhay niining ubang nga kalalaken-an?”

¹²⁴ Mao na kana mismo. Mao na kana. Pagmoadto ako sa siyudad, sa tan-aw n’yo ba ang Assemblies of God makigtambayayong kanako? Dili sa kung unsa ang ginatoohan ko, ayaw gayud nila. Makapahigayon og usa usahay. Sa tan-aw n’yo ba nga makigtambayayong ang mga Methodist? Sulayi ninyo, ug mahibaloan ninyo. Sulayi nga mamahimo ka nga akong manedyer sulod sa usa ka semana. Pagmosulod kamo, mosulod kamo sa Ngalan ni Jesus. Husto kana.

¹²⁵ Oh, siyempre, dalhon ka nila didto, sigurado, dalhon ka nila didto sa kung asa nga lugar, ug aron nga dili ka konektado kanila sa kung unsa man nga paagi sama niana. Ug dayon pagwala ka na, moingon, “Oh, karon, medyo wala na sa husto nga pangutok si Igsoong Branham nga medyo gamay lang, kabalo ka na. Siya’y. . .”

¹²⁶ Kung wala ako sa hustong pangutok, kung ingon-ana ang Biblia wala sa hustong Pagtolon-an. Mao kana ang gisulti sa Biblia! Oo, sir. Magbantay gayud!

¹²⁷ Miingon si Jesus, “Nganong ginatawag ninyo Ako nga ‘Beelzebub’? Nagtoo kamo kang Solomon, sa iyang ilhanan sa pagpang-ila. Nagtoo kamo sa iyang adlaw. Ang Reyna sa

Habagatan miadto nga gikan pa sa kinatumyan sa yuta, aron makita kadto nga gasa, ug gitooohan niya kini sa pagkakita niya niini. Ug nagalingkod kamo ug ginatan-aw kini adlaw-adlaw, ug wala ninyo kini ginatooohan.”

¹²⁸ Ug ang Mismo Niyang mga igsoon wala mitoo Kaniya. Miingon, “Pangadto kamo sa fiesta,” miingon Siya, “apan dili Ako moadto sa karon.” Mipaingon Siya sa laing direksyon, tungod kay ang Mismo Niyang mga igsoon wala mitoo Kaniya. Husto kana. “Masigpit ang pultahan, ug hiktin ang dalan, ug apan diyutay ra ang mga makatultol Niini.”

¹²⁹ Kung hisgotan ang mga tinun-an, didto na sa pagpakitaay, asa na sila? Usa ra ka babaye ug usa ka lalaki ang mitindog didto duol sa krus uban Kaniya, si Juan ug si Maria. Wala na ang tanang uban pa kanila.

¹³⁰ Kini na ang pagpakitaay. Kini na ang takna. Kini na ang panahon nga ang Dios nagapamuhat og mga butang. Kini na ang panahon nga ang Mesias anaa sa yuta. Kini na ang panahon nga ang Gahum sa Dios nagapanglihok diha sa Iyang mga tawo. Ug ginatawag nila sila og “mga holy-roller, mga buangbuang, wala sa hustong pangutok,” oh, mga ingon niana. Apan ania na ang maong takna!

¹³¹ Siguradong aduna gyud og pipila ka dagkung mga pagkapalaw didto sa paghukom.

¹³² Oh, ang tigpayuhot og bino, nakahibalo siya kung unsa ang madangatan pagdidto na sa paghukom. Mao usab ang palahubog nga nakahibalo kung unsa ang madangatan niya. Nakahibalo usab ang bigaon kung asa siya magatindog. Nakahibalo usab ang sugarol kung asa siya magatindog. Mao usab ang palahubog nga nakahibalo kung asa siya magatindog. Dili siya mapalaw.

¹³³ Pero asa man ang pagkapalaw nianang tungora, sa kadtong mga nagdahum nga husto sila. Dinha ang mga pagkapalaw. “Pagkaabot nila didto, miingon, ‘Oo, nanagpagula kami og mga yawa sa Imong Ngalan. Mga magwawali kami. Miyembro kami sa ingon niini ug ingon niana nga mga iglesia. Nagpamuhat kami og dagkung mga milagro. Oh, ningwali kami! Aba, nahimo akong usa—nahimo akong usa ka tinugyanan sa iglesia. Nahimo ako nga obispo. Nahimo akong *ingon niini*.’ Pahawa kamo Kanako, kamong mga mamumuhat og kadautan, wala gani Ako nakaila kaninyo.” Mao na kana. Mao na kana ang pagkapalaw. Miingon Siya, “Mangadto ang mga anak sa ilang mga anak ug manglingkod didto sa Ginghamian, moingon, ‘Aduna kami og katungod nga maania dinhi,’ ug ipangtambog sila ngadto sa kangitngitan sa gawas, kon diin adunay mga pagpanghilak ug mga pagdanguynguy ug pagkagot sa mga ngipon.” “Masigpit ang pultahan, hiktin ang dalan, nga nagahatud ngadto sa Kinabuhi, diyutay ra ang mga makatultol niini.”

¹³⁴ Kaninyong, minahal ko nga katawahan, ning buntaga, pagpaminaw niini. Dili ko hinimo-himo kini. May katungdanan ako sa pagsulti Niini. Kana lang ang katungdanan ko. Kung dili na gyud ako makawali og usa pa ka sermon sa akong kinabuhi, kana mao ang Kamatuoran: adunay pipila ra ka mga tawo ang maluwas. Timan-i lang kana: pipila ra gyud. Kinahanglan nga usa ka kanila.

¹³⁵ “Kinsa man sila, Igsoong Branham? Wala ko kahibalo. Walay si kinsa man ang nakahibalo. Panlimbasugan nato ang kaugalingon natong kaluwasan uban ang kahadlok ug pagkurog.

¹³⁶ Apan luminya kamo sa Dios. Kung ang inyong kasingkasing wala nagapitik subay nianang Biblia, nan aduna sa kung unsa nga sayup, aduna gyu’y butang nga sayup. Bisan unsa pa ang ginaingon sa inyong iglesia, dili kamo makasulod pinaagi niana. Kinahanglan nga mosulod kamo pinaagi sa kung unsa ang giingon sa Dios. Kini ang Libro nga kamo pagahukman, ang Biblia. Magpabilin kamo Niini!

¹³⁷ “Oh,” moingon ka, “bueno, nabautismohan man ako sa Ngalan ni Ginoong Jesus.” Husto kana, sa Biblia kana. Apan kung kana nga kinabuhi wala nagasunod niini, wala kini nakahimo og kaayohan nga nabautismohan ka.

¹³⁸ Moingon ka, “Bueno, nadawat ko na ang Espiritu Santo.” Maayo kana, mao kana ang angay mo gayud buhaton. Apan kung ang maong kinabuhi wala dinha!

¹³⁹ Hinumdumi, ang bunglayon nagadawat sa mao ra nga kusog nga nagakahulog ngadto sa trigo aron patuboon kini, ginapasinggit ang bunglayon, usab. Motindog nga tul-id ang maong gamay nga bunglayon ug ingon ka malipayon nga sama sa trigo. Husto kana, nagakinabuhi pinaagi sa mao ra nga kinabuhi. Ug ang usa ka makasasala makapabilin diha sa Presensiya sa Dios, magsinggit og kadaugan, ug magkinabuhi nga sama sa usa ka Cristohanon. Apan kung walay butang nga pagbag-o diha sa kasingkasing! Mahimo nga makaangkon siya og mao ra nga Gahum sa pagpagula og mga espiritu sa yawa. Ingon niana ang giingon ni Jesus. Mahimo niya ang pagwali sa Maayong Balita nga ingon ka maayo nga mahimo sa uban pa nga magwawali. Eksaktong ingon niana, ang giingon ni Jesus. Ginatudlo kini sa Biblia. Oo, sir. “Bisan nagasulti pa ako og mga dila sa tawo ug sa mga manolunda, bisan itahan ko pa ang akong lawas aron sunogon ingon nga usa ka halad, ipanghatag ko pa ang tanan kong katigayunan sa pagpakaon sa mga kabus, ako—aduna man ko’y pagtoo nga arang ko mabalhin ang mga bukid, himoon ko man ang tanan niining mga butanga, iwali ang Iyang Ngalan, pagulaon ko man ang mga yawa sa Iyang Ngalan,” ingon niya, “wala ako’y kapuslanan.” Busa, mahimo man niya kini, ug “walay kapuslanan.” Nakuha ba ninyo ang ideya?

¹⁴⁰ Karon, ang butang nga angay buhaton mao nga, gikan sa inyong kasingkasing, magmahimong Cristohanon, karon sumulod kamo sa masigpit nga pultahan. Kay, halapad ang dalan nga nagahatud ngadto sa pagkalaglag, ug minilyon sa minilyon ka pilo nga mga magtotoo sa niini nga henerasyon ang magasulod agi niini. Tungod kay, masigpit ang pultahan, ug hiktin ang dalan, ikaw ug si Cristo lamang.

¹⁴¹ “Hiktin ang dalan nga nagahatud ngadto sa Kinabuhi, ug diyutay ra lamang ang makatultol niini.” Karon, mga Pulong kana sa atong Ginoo. Sus! Unsa ma’y Iyang ginabuhat? Nagatindog didto, nga ginatugkad ang ilang mga hunahuna.

¹⁴² Ug miingon siya, “Siya si Beelzebub. Bueno, unsaon man Niya pagkahimong Dios? Tawo Siya! Asa man nagagikan kini nga kaalam?” ingon nila nga didto sa Kaugalingon Niyang siyudad.

¹⁴³ Pagmosulod ka sa siyudad dinhi, daw sama kini sa . . . Wala ko ginasulti kini nga walay pagtahod kaninyong mga tawo; mga Cristohanon kamo, gihigugma ninyo ako. Pagmosulod ka sa siyudad dinhi, ug daw sa ginahampak ka sa gahum ni Satanas. Kondenado na kini nga lugar. Kondenado na kini nga siyudad.

¹⁴⁴ Unsa ang giingon ni Billy Graham pagkasulod niya sa Louisville? Miingon siya nga kana ang “pinaka-gigamhan sa demonyo nga lugar” nga nakita niya sukad sa tibuok niyang kinabuhi. Nasulat kini sa mantalaan, miingon, “Mabati mo gayud ang pagpanglupig sa Yawa.”

¹⁴⁵ Siyempre, mabati ko kini. Ngano man? Kaugalingon ko kini nga lugar. Pagbalik ni Jesus kaniadto sa Kaugalingon Niyang lugar, miingon Siya, “Daghang gamhanang mga buhat ang dili Niya mabuhat, tungod sa ilang pagkawalay-pagtoo.” Miingon, “Walay usa ka propeta nga walay kadunggan, ang usa ka magwawali, gawas nga kini anaa sa kaugalingon niyang—anaa sa kaugalingon niyang lungsod, taliwala sa kaugalingon niyang mga tawo.” Kita n’yo? Dili mo kini mapugngan, ingon niana ang ginasulti sa Kasulatan. Kita n’yo?

¹⁴⁶ Karon, pagmolakaw ka dinhi sa siyudad! Ug ayaw ko sultihi nga dili ko mahibaloan. Moduol ako sa mga tawo nga nagapakiglamano kanako ug nga nagaingon, “Oh, Igsoong Branham, gimahal ko ikaw.” Ug nahibalo ka nga bakak kana! Mahibaloan mo nga bakak kini. Kung masulti sa Dios ang mga pag-ila sa kasingkasing, nganong dili man Niya masulti kana kanako?

¹⁴⁷ Oo, ug mismo sa taliwala sa kaugalingon mong mga isigkalungsuranon sa tibuok siyudad! Pagmakita ka nila, moingon, “Bueno, kabalo mo, nakita ko kung asa ang ingon-ani ug ingon-ana . . .”

“Asa? Asa kadto?”

“Didto sa itaas sa . . .”

“Huh! Nakaila mi nianang tawhana!”

¹⁴⁸ Mabati mo kini. Sultihan ko kamo, pasudlon ninyo sa inyong balay ang usa ka tawo nga dili ninyo kaayo nagustohan, molingkod sulod sa inyong balay sa kadali ug mabati mo kanang salikwaut nga pagbati. Padaghana kana sa katorse ka libo ka higayon, dayon makuha ninyo kung unsay akong ginahisgotan. Dayon moadto ka sa usa ka lugar kon diin ang tanan nagahigugma kanimo, kanang mabati mo nga ginaabiabi ka, mao gayud, oh, sus, ug gusto mo na lang magpabilin didto hangtud-hangtud, kita n’yo. Mao kana, kita n’yo, usa kini ka espiritu. Ug wala nakahibalo ang mga tawo kung unsa kini, nagakatingala sila kon ngano nga ingon na gayud ka natakboyan ang mga tawo.

¹⁴⁹ Unsa man ang nakapahimo sa maayong mga kababayan-an, unsa man ang nakapahimo sa maayong mga kababayan-an nga magsul-ob niining mga malaw-ay nga mga bisti ug manggawas didto? Unsa ma’y nakapahimo, bisan sa karon nga matugnaw pa, mga batang babaye nga dise-sais pa ang mga panuigon, nga nagsul-ob og ingon nianang mga bisti nga dili niya angay isul-ob bisan sa atubangan sa iyang inahan, ug atua siya sa dalan? Kini dili, tungod nianang bataa (walay unsa man nahibaloan kana nga bata), kondili tungod kini sa usa ka magwawali dinha sa pulpito nga napakyas sa pagbuhat sa iyang katungdanan. Husto gyud kana. Oo. Mga babaye nga molakaw dinha sa dalan, ug nakabisti og mahilas ug mga butang nga sama niana, ug lantawon sila sa mga makasasala ug wala gyud nakahibalo nga sa pagkatinuod siya nakasala na sama nga nakigpuyo siya uban nianang lalaki. Mao kana ang giingon ni Jesus! Nag-ingon si Jesus, “Ang tanan kadtong nagatan-aw sa usa ka babaye sa pagkaibog kaniya, nakapanapaw na uban kaniya sa iyang kasingkasing, ug tulubagon niya gayud kini sa adlaw sa paghukom.” Masigpit ang pultahan, ug hiktin ang dalan!

¹⁵⁰ Kabalo ko nga nagahunahuna kamo nga estrikto ako nga tawo. Dili ako estrikto! Ako’y inyong igsoon, ug gihigugma ko kamo.

¹⁵¹ Pagkalagiw gikan sa kapungot nga umalabot! Pagduol sa krus ug paghilak didto hangtud nga ang inyong kasingkasing mapuno sa Iyang Espiritu, nga magapatalikod kaninyo gikan sa tanang butang nga iya sa kalibutan, ug magalakaw nga diosnon sa Iyang atubangan, nga nagadilaab ang inyong kasingkasing alang Kaniya. Paghigugma! Dili nga usa ka katungdanan. Dili katungdanan si Cristo, aron alagaron si Cristo, tungod sa gugma nagaalagad ka kang Cristo. Ginatulod ka niini, ginapugos ka, hangtud nga ang matag pitik sa imong kinabuhi nagapitik subay Kaniya. Dinha na kon diin mo makita ang kasal-anan.

152 Ug mihilak Siya kaniadto sa yuta. Nasubo ang Dios niadtong mga adlaw ni Noe, sa diha nga nakita Niya ang mga kasingkasing. Ug didto si Jesus ibabaw sa bungtod, ug miingon, “Jerusalem, Jerusalem, sa makadaghan gipangandoy Ko nga lumluman ka, apan miabot na ang imong takna ug biniyaan ang imong balay.”

153 Maingon man usab kini sa Pag-abot sa Anak sa Dios, ang kasingkasing sa mga tinuod nga magtotoo nagakasubo. Makita niya sa karon nga angay nga aduna unta og rebaybal nga magkaylap niining yutaa. Unsaon man nga nahimo kining pinaagi man og panon sa mga ilihetimo? Naunsa na man kini, sa dihang kondenado na sila sa sugod pa lang?

154 Ang Ginghamarian sa Dios sama sa usa ka tawo nga mitaktak og pukot ngadto sa dagat, ug, sa diha nga gibira niya kini, nakakuha siya og mga pawikan, mga bao, mga bitin, mga baki, pipila ka isda. Dili siya ang nagabuot kung hain ba sa mga niini, iya lang itaktak kini didto sa pangpang. Ingon niana ang ginabuhat sa Maayong Balita. Ingon niana ang ginabuhat ni Billy Graham, Oral Roberts, og nako, ug sa tanang uban pa nga mga magwawali nga nagawali sa Maayong Balita, ginataktak kini, ginabira kini, “Ania na sila, Ginoo.” Apan unsa man ang ginabuhat nato pirme? Mahibal-an na lang nato, sa dili ka pa makabalik pag-usab, atua na sila nga ningbalik pag-usab sa lanaw. Unsa man kini? Sa sugod pa lang, usa na kini ka pawikan. Wala kadto nakapausab kaniya, ang masikup siya diha sa pukot sa Maayong Balita. Usa na siya ka pawikan sa sugod pa lang. Usa na siya ka bao sa sugod pa lang. Usa na siya ka bitin sa sugod pa lang. Usa na siya ka tigpakaaron-ingnon sa wala pa siya nakasulod sa iglesia. Wala siya’y tinguha bisan man lang nga undangon ang iyang pag-inom-inom ug pagsugal, ug pagpanigarilyo ug pagpamakak, ug pagpangawat. Misulod lang siya tungod nga nahadlok siya sa impiyerno. Labi pang ginahimo mo ang imong kaugalingon nga kandidato para niini, pag-ginahimo mo kana. Matuod kana. “Masigpit ang pultahan, ug hiktin ang dalan, ug diyutay ra ang makatulfol niini.”

Mag-ampo kita.

155 Ginoo, oh, susiha ako, Ginoo. Husaya ang akong kaso karon mismo, Ginoo. Ayaw ipahanugot nga kinahanglan ko pa nga mag-atubang sa hukmanan sa atubangan Mo, human nga miwali og ingon niini. Oh, kung aduna ma’y mahugaw nga butang kanako, Ginoo, tangtanga kini, mahimo ba! Makita namo ang adlaw nga gikapuy-an namo, kon diin ang mga kalalaken-an ug mga kababayen-an nagmagahi na. Makauulaw sila. Nag-ingon Ka usa niana ka higayon kaniadto, “Wala na’y pagkaulaw sa mga anak nga babaye sa Sion.” Nangawala na ang ilang mga pagkaugdang hangtud nga dili na gani sila mangaulaw. Oh Ginoo, hunahunaa lang gyud kini! Ug nahibaloan nga ang orasan dinha pahurot na nga nagatiktak, usa na lang o duha pa

ka minuto, ug moabot na ang dakung pagkagun-ob, kung ingon-ana siya nga mahugaw magmahugaw pa sa gihapon.

¹⁵⁶ Dios, pukawa kaming tanan ning buntaga. Tay-oga kami, Ginoo! Makita namo ang mga ilhanan nga nagapakita na. Nakabuka ang among mga mata aron nga mahibaloan kana. Makita namo ang minilyon, mga minilyon, Ginoo, ang ningtalikod ug ninghawa. Ginahunahuna ko, unsa ma'y akong mahimong buhaton, unsa ma'y akong mahimo, Oh Ginoo? Aduna ba og bisan unsa man, Ginoo? Kung nagkinahanglan pa kini og dugang nga pagwali, dugang pa nga pag-ampo, dugang pa sa kung unsa man, tabangi ako, Ginoo, aron nga madala ko ang Mensahe ngadto sa mga tawo. Unsa man ang mahimo ko? Apan padayon nilang ginasalikway Kini. Ginabuhat Mo ang Imong dagkung mga ilhanan ug ginapanghimo na ang Imong mga milagro, ug bisan pa niana padayon lang sa gihapon ang mga tawo. Kini na ba ang Imong Kasulatan nga kinahanglan matuman, kini na ba ang panahon nga, "Walay tawo nga makaduol Kanako gawas kung pagadanihon siya sa Akong Amahan, ug ang tanan nga gihatag Kanako sa Amahan magaduol Kanako"? Ginoong Dios, itugot ning buntaga nga mapukaw ang mga tawo ug makita kining kaulahiing ilhanan sa yuta. Nagaampo ako, Dios, nga aduna Ka'y igihatag sa mga tawo.

¹⁵⁷ Panalangini kining kabus nga mga tawo ning buntaga. Dios, sugdi kang Igsoong Neville, Ginoo. Ayoha ang iyang lawas. May sakit siya ning buntaga, Ginoo, sakit sa tiyan. Nagaampo ako nga ang Imong kamot nga nagaayo maanaa kaniya. Pukawa ang iyang kalag.

¹⁵⁸ Dios, umanhi Ka sa taliwala niining kongregasyon. Adunay mga kabalaken-an ug kababayen-an nga naglingkod dinhi nga mahimong dili ko na gayud makita pa pag-usab hangtud nianang adlaw na sa paghukom, kon diin magapanubag ako. Apan nabasa nako sa Imong Pulong, "Masigpit ang pultahan, ug hiktin ang dalan, ug apan diyutay ra lamang ang nakatultol niini." Oh Ginoo, tugoti nga sila kanang "diyutay ra," ang pipila kanila, mahimo ba, Ginoo? Itugot kana sa matag tawo dinhi.

¹⁵⁹ Nagaampo ako sama nga ang tawo makaampo lamang. Ginoo, buhaton sa niining mga tawo ang bisan unsa man para kanako, aron lang nga matabangan ako. Kung gutom ako, pakaonon nila ako. Kung nagkinahanglan ako og bisti, paliton nila kini. Mag-amotay sila ug palitan ako og sakyanan, aron maiwali ang Maayong Balita. Buhaton nila ang bisan unsa man sa nianang paagi. Oh Amahan, susiha ang ilang mga kalag ning buntaga, kon mahimo, ug tugoti sila nga susihon kini sa atubangan Mo. Wala ako nahibalo, nagasalig ako nga anaa ang matag usa kanila sa nianang mga Pinili. Ug iapil ako dinha, usab, Ginoo. Ug kung aduna ma'y hinungdan para dili ako mahiapil dinha, Ginoo, Imong ipahayag kini kanako, ako kining tul-iron

karon mismo. Gusto kong makasigurado, Ginoo, nga sa nianang buntaga dili ako magkaproblema didto sa maong suba. Gusto ko nga makauban nianang adlaw. Ug wala ako nakahibalo kung kanus-a kana, mahimo kini sa karon na. Busa, tabangi ako nga mahibalo, tabangi kini nga mga tawo nga mahibalo.

¹⁶⁰ Ug pagmakita gayud namo ang among mga kasingkasing nga walay pagpakabana! Oh, malipay kami sa usa ka maayong Mensahe nga madungog diha sa radyo, o sa pagsimba. Ginahatagan namo og bili ang usa ka maayong Mensahe. Wala kami nagapanuko sa pagsulti mahitungod kang Jesus sa kung asa man. Apan, Ginoo, nahimo na bang usa ka dakung kabug-aton ang kasal-anan kanamo nga nagahatud kini og mga luha sa among mga mata, sa pagpanghupaw ug sa paghilak ug sa pagbarug batok niini, sa tanan na, sa mga dulumtanan nga gibuhad sulod sa siyudad? Ginoo, tugoti nga ang Manolunda sa Dios makita kana kanamo, ug markahan kami. Itugot kini, Ginoo.

¹⁶¹ Oo umanhi Ka, Ginoong Jesus, karon ug iandam ang among mga kasingkasing, ug ihatag kanamo ang Imong matuod nga mga ilhanan nga ania Ka sa taliwala namo, aron mahibaloan namo nga amo nang ginadawat—ginadawat ang ulahing ilhanan sa dili pa ang katapusan sa niining henerasyon.

¹⁶² Ug amo nang makita ang maong mga pagka-ilehitimo, sa diha nga ang mga lalaki nga ania sa nasud ug nagkaaduna sila og mga anak diha sa mga asawa sa ubang lalaki, ug—ug gagmay pa nga mga batang babaye diha sa dalan, ug ginatus kanila ang gipapahawa sa mga eskwelahan matag tuig ug tinedyer pa lang mga inahan na, ug mga wala na'y pagtahod, ug kung unsa nga ang mga kababayan-an nahimo nang mga hilo, sa ilang mga kaugalingon, tungod sa pagpanigarilyo ug—ug sa pag-inom-inom, ug ang mga telebisyon ug uban pa nga nagapadaut sa mga hunahuna sa mga bata. Oh Ginoo, hangtud kanus-a pa kaha kini magpadayon? Ug Ikaw, nga usa ka Balaan gayud nga Dios!

¹⁶³ Oh Amahan, akong—pagkatalagsaon ang ginabati ko sa karon nga aduna gyu'y usa ka butang ang kinahanglan nga buhaton sa gilayon, Ginoo. Wala ako kahibalo kung unsay isulti, apan nagaampo ako, Ginoo, nga Imong ibutang sa among mga kasingkasing kung unsa ang buhaton. Itugot kini nga mga butang, Ginoo. Amo kining ginapangamuyo sa Ngalan ni Jesus. Amen.

¹⁶⁴ Duol na ang takna. Ang matag tawong may salabutan nga adunay kaisipan, nakahibalo nga adunay butang nga andam nang mahitabo. Walay tawo sa sulod niini nga bilding, nga anaa sa iyang hustong pangutok, kondili ang nakahibalo gayud nga ang kalibutan dili mahimong mopadayon nga anaa sa ilalum niini nga mga kahimtang.

Dili kita makapadayon, mga higala. Wala ni usa ka butang, ingon nga inyong pastor ug inyong igsoon, wala ni usa ka butang nga mahimo ko kamong agakon ngadto ning buntaga kondili kang Jesus Cristo lamang. Wala ni usa ka butang nga nahibaloan ko. Hunahunaa lang ang mga butang nga gipangtagna na nga moabot sa dili pa mahitabo ang Pagsakgaw, ang tanan-tanan nga nahibaloan ko human nang nangatuman.

¹⁶⁵ Moingon mo, “Unsa na man ang mahitungod sa marka sa mapintas nga mananap?” Magaabot kana diha na sa dakung Kasakitan. Wala na ang iglesia nianang tungora. Dili na kinahanglan nga markahan ang mga niini, wala na ang mga niini, kita n’yo. Ang mga pagmarka nagakahitabo na sa karon. Ang pagmarka mao ang pagpakita, sa matang. Mangalagiw kamo ngadto sa Dios, mangalagiw kamo ngadto Kaniya sa gilayan!

¹⁶⁶ Ginahunahuna ko karong buntag, samtang nga nagahulat kita dinhi sa kadali. Ug mabati ko ang sama sa ginabati n’yo. Akong—mabati ko ang ginabati n’yo, ang matag usa kaninyo nga nagahunahuna, “Oh Dios, susiha ako!” Ingon niana ang ginabati ko, usab. Naamgo ko nga ang mga Mensahe nga sama niini, mga higala, dili popular sa mga tawo. Imo silang ginakondena ug imong ginakon- . . . imo—imo silang ginapakaubos. Kinahanglan adunay tawo nga magbuhat niana. Gusto ko nga uban na lang unta nga tawo. Apan kung sa ako kini gihatag nga katungdanan aron buhaton kini, kung ako man kinahanglan ang mamahimong tiglaba nga babaye, tugoti ko nga maglaba. Kung ako . . . Nag-ingon si David, “Palabihon ko pa nga mamahimong usa ka trapo sa pultahan sa Balay sa Dios, kay sa magpuyo sa mga balong-balong sa kasal-anan.” Husto kana. Kung unsa ma’y ginapabuhat sa Dios kaninyo, buhata kini. Dili kamo magmaulaw. Kung adunay . . .

¹⁶⁷ Ug, hinumdumi, nasayod ako nga usa kana ka daku nga butang. Moingon, “Igsoong Branham, ang ingon mo ba nga walo lang ka mga kalag ang maluwas?”

¹⁶⁸ Wala ako nakahibalo kung pila ang maluwas, dili ako makasulti kaninyo. Apan usa ka butang ang masulti ko: pipila ra gyud sila, sa panahon nga sama niini. Hunahunaa lang, sa Iyang adlaw kaniadto, kung unsa ka daghan ang naluwas. Hunahunaa ang panahon ni Noe, ug ang panahon ni Lot—ni Lot, ug tanan sila, miingon Siya, “Maingon man usab sa Pag-abot sa Anak sa tawo, tungod kay, masigpit ang pultahan, ug hiktin ang dalan.” Nakita n’yo, nagasulod ka nga ikaw ra, uban Niya, ug ingon niana lang. Kita n’yo? “Ug apan diyutay ra ang nakatultol niini.” Pila man ang nagatoo nga kana ang Kamatuoran sa Ebanghelyo? Mao kana ang giingon ni Jesus Cristo, “Diyutay ra ang nakatultol niini.” Pipila ra gyud. Kinahanglan mamahimo kang usa sa nianang pipila. Nahibalo ako nga bug-at kana, malisud gyud. Ug malisud kanako nga isulti kini, nga may

pagbati nga tawhanong paghigugma alang kaninyo, apan ang gugma sa Dios ang nagapugos kanako nga isulti kaninyo.

¹⁶⁹ Karon, ang mao ra nga Balaang Espiritu nga namuhat kaniadto sa mga adlaw ni Abraham, nga namuhat sa mga adlaw ni Cristo, ang nagsaad nga maania karon sa pagbuhat sa mao rang butang. Ania Siya dinhi. Karon, kung nagsulti ako kaninyo sa Kamatuoran, obligado ang Dios sa nianang Kamatuoran.

¹⁷⁰ Kung wala ko ginatuman ang akong pulong, dili ako tawo nga matinud-anon sa akong pulong. Kung wala ninyo ginatuman ang inyong pulong, dili kamo tawo nga matinud-anon sa inyong pulong. Karon, mahimong mosaad ako kaninyo og usa ka butang ug dili ko matuman kini, apan—apan moadto ako nga sultihan kamo. Kung aduna ko'y utang kaninyo, ug magtago gikan kaninyo, usa ako ka tigpakaaron-ingnon. Kung moadto ako kaninyo, “Aduna ko'y utang sa imo, apan dili pa ako makabayad kanimo, apan buhaton ko ang tanan kutob sa mahimo ko,” kung ingon-ana pasayloon mo ako ug tabangan pa ako. Kita n'yo?

¹⁷¹ Kitang tanan adunay utang sa Dios. Utang nato Kaniya ang atong mga kinabuhi. Magmatinuuron kita bahin niini. Mogawas ug moingon. . . Ayaw pagsulti'g, “Bueno, karon tan-awa, ako—ako'y Presbyterian. Methodist ako. Pentecostal ako. Church of God ako. Nazarene ako. Pilgrim Holines ako.” Ayaw paghunahuna og ingon niana! Magkaadunay minilyon sa mga niana didto sa impiyerno. Kinahanglan Cristohanon ka, diha kang Cristo.

¹⁷² Pila man ang moingon, “Igsoong Branham, hinumdumi ako diha sa pag-ampo karon, gusto kong motindog”? Panalanginan ka sa Dios.

¹⁷³ Ginoo, nakita Mo ang ilang mga kamot. Ania na ang takna, gipahilum na sa gamhanan nga Balaang Espiritu kini nga bilding karong buntaga. Mabati ko ang Imong Presensiya. Nasayran ko nga ania Ka aron pasidunggan ang Imong Pulong, “Ako ang Ginoo nga nagtanum, ug pagabisbisan Ko kini sa adlaw ug sa gabii, basin unya may moagaw pa niini gikan sa Akong kamot.” Imong gipadala ang Imong Pulong aron buhaton ang usa ka katuyoan, ug Kini—kinahanglan Niini nga buhaton kana, Ginoo. Nagaingon ang Kasulatan nga Ikaw ang mao sa gihapon kagahapon, karon, ug hangtud sa kahangturan.

¹⁷⁴ Dili sila makatoo kaniadto, dili makatoo kadtong mga tawo sa Imong panahon nga ang Balaang Espiritu anaa Kanimo. Ug ginahimo Mo kono ang Imong Kaugalingon (ingon nga usa ka Tawo) nga Dios, nga, Ikaw man gayud ang natawo-sa-ulay nga Anak sa Dios nga mianhi sa yuta aron nga tuboson kami gikan sa among mga kasal-anan. Ug tungod nga nakita nila Kanimo ang Espiritu sa Dios, gipaninguhaan nila kini nga lahion. Ug Imo silang gisultihan, Ginoo, “Dili Ako ang nagapamuhat sa maong mga buhat, ang Amahan Ko kini nga nagapuyo Kanako.

Siya ang nagabuhat sa maong mga buhat. Kung ginatawag ninyo si Abraham nga inyong ‘amahan.’ Nakita na ni Abraham ang Akong adlaw.” Oo, nakita na niya, sa diha nga nagatindog siya kaniadto tapad Niya, nakita Siya nga ginapamuhat kadto nga mga buhat ug ilhanan. “Nakita niya ang Akong adlaw ug nagkalipay.” Miingon, “Nangasayup kamo, kay wala ninyo hibalo ang Kasulatan bisan ang Gahum sa Dios, kung unsa nga mahimong landungan sa Dios ang usa ka ulay, ug iganak niini ang usa ka Bata (pinaagi sa pagkahimugso diha sa usa ka ulay) ug magapuyo Siya Mismo sa pagkabug-os sa Iyang Gahum, sa nianang usa ka Tawo.”

¹⁷⁵ Ug kung unsa nga mahimo Niyang gamiton kanang mao ra nga Dugo gikan niana nga Lawas nga Iyang gihatag ingon nga usa ka Halad, ug hinloan ang usa ka katawhan nga Iya Mismong pagapuy-an, nga magpadayon sa Iyang buluhaton ngadto sa katapusan sa pagtibawas! Oh Dios, pukawa ang mga tawo nga makita kana. Itugot kini. Luwasa ang tanan nga nagpataas sa ilang kamot. Hinloi ang ilang mga kasingkasing. Ginoo, nakataas usab ang akong mga kamot. Hinloi ako, Oh Ginoo. Usa kini ka balay sa pagpanul-id. Usa kini ka lugar kon diin nga kinahanglan kaming mahugasan. Tugoti nga hugasan kami sa Balaang Espiritu niining buntaga, ug hinloan kami gikan sa mga pagkadautan.

¹⁷⁶ Nagaampo kami, Ginoo, nga walay tawong mohawa dinhi gawas nga mapuno siya sa Imong Espiritu. Mahimong wala ni usa ka emosyon sa panggawas pagmahitabo kini. Apan, Ginoo, sumulod Ka, tangtanga ang tabon ug ipakita kanamo kung unsa kami, Ginoo. Itugot kini. Ug dayon pun-a kami sa Imong Espiritu, nga may kasingkasing nga matuod ug lunsay. Ug sa niining panahon sa mga pagpanglutos ug bug-at nga mga pagsulay, dugang Ka pa nga magmatam-is ug bililhon kanamo samtang nga kami nagapanglakaw, nagahulat alang nianang adlaw. Samtang nga nagatulo ang among mga luha, tungod sa mga kasal-anan sa siyudad, hinaut nga ang Balaang Espiritu modungaw ug moingon, “Adunay usa nga mahimo Ko nga markahan, Akoa ang maong lalaki, Akoa ang maong babaye.” Itugot kini, Ginoo. Hinaut nga makita kini sa amo karon. Amo kining ginapangamuyo sa Ngalan ni Jesus. Amen.

When I come to the river at the ending of day,
 And the last winds of sorrow have blown;
 There'll be Somebody waiting that will show
 me the way,
 I won't have to cross Jordan alone.
 I won't have to cross Jordan alone,
 Jesus died all my sins to atone;
 When the darkness I see, He'll be waiting for
 me,
 I won't have to cross Jordan alone.

177 Gusto ko Siyang maila karon. Kuhaa ang akong kamot, bililhon nga Ginoo, padayon Mo akong giyahan, tugoti akong magbarug. Tugoti akong magbarug dinhi, Ginoo, batok sa tanan nga gitawag og sayup, sa tanan nga medyo sayup. Dili ko igsapayan kung unsa ma'y ingnon ni kinsa man, tugoti ko nga magbarug, Ginoo. Sa diha nga nabuhat ko na ang tanan kong mahimo, tugoti ko nga magbarug. Kuhaa ang akong kamot, ug biraha ako niini, Ginoo. Magbuhat Ka og usa ka butang, tugoti ko sa pagbarug. Pagmoabot kini nga mga butang, ug ang mga bahandi niining kalibutan ug ang tanan nga mga pagpasigarbo ug kadungganan niini; butaha ang akong mga mata niini, tugoti nga Siya lamang ang makita ko Nga namatay para kanako. Kung ang bugti niini mao ang matag higala ko, kung ang kabaylo man niini ang tanan-tanan nga aduna ako; wala kana nagakahulogan ni usa ka butang, ginsurender ko kini tanan diha sa altar. Mao kana, tugoti akong magbarug nga matinud-anon. Ug moabot ang adlaw nga mohuyop na ang matugnaw nga hangin sa akong nawong, ug masayran ko nga miundang na ang kasingkasing ko ug human na ang akong mga adlaw, ug tapus na ang mga oras ko ug gikuha na ang akong kard gikan sa sab-itanan niini, dili ko gustong motabok sa Jordan nga ako ra. Maatua Siya didto. Oo. Pagmakita ko na ang kangitngit, maatua Siya didto nga nagahulat kanako, dili ko kinahanglan magtabok sa Jordan nga nag-inusara. Kung magabarug ako karon alang Kaniya, magabarug Siya alang kanako nianang tungora. Magakinabuhi ako alang Kaniya nga namatay alang kanako, daw sa unsa ka mamahimong malipayon ang akong kinabuhi kung ingon-ana. Gusto ko nga sa ingon niana nga paagi ako magabarug.

178 Aduna siguro og masakiton nga mga tawo dinhi. Aduna ba siya'y gipanghatag nga mga kard? Nakalimot man gud ko. Nanghatag ba sila og mga kard? Aduna ba og unsa man nga mga kard ang napanghatag? Kinsa ba ang adunay mga prayer card? Wala.

179 Nagahulat lamang ako sa Balaang Espiritu. Kung motoo lang gyud kamo, pag-too lang, ayaw pagduhaduha. Kung ipadayag kanako sa Dios ang inyong mga sakit... Unsa man kini, wala ako nakahibalo; kung ipataas ninyo ang inyong kamot, nga wala kamo nakaila kanako ug ako wala nakaila kaninyo. Dayon kung igapadayag sa Dios dinhi, motoo ba kamo nga ang mao ra nga Manolunda kini nga naghatud sa Mensahe didto sa wala pa ang paggun-ob kaniadto, kini ang mao ra sa gihapon nga Manolunda ang nagadala niini mismo karon sa dili pa ang usa na usab ka pagkagun-ob. Pagatoohan ba ninyo kana? Kung inyong toohan, ipataas ang inyong kamot. Sige. Sige, hinaut nga itugot kini sa Ginoo.

180 Nagalingkod siya duol kanako. Adunay usa pa nga nagalingkod duol kanako, si Mrs. Snyder dinhi, o kining si

Mrs. Murphy dinhi, ang ngalan niya, nga nagalingkod dinhi mismo. Nakaila ako kanila.

¹⁸¹ Wala ako nakaila sa niining lalaki, wala ko siya hiilhi. Apan nakaila ang Dios kaniya. Kung igapadayag kini sa Dios karon, pila man kaninyo ang nahibalo nga dili kini . . .

¹⁸² Ayaw pagtan-aw kanako. Ay, usa ra ako ka tawong taga-bukid sa Kentucky, kung kana ang hisgotan. Ako—wala gani ako og igong edukasyon, halos, aron—aron makasulat sa kaugalingon kong ngalan. Apan adunay usa ka butang nga nahibaloan ko, nakaila ako Kaniya. Ug kana, kana—kana lang ang importante kanako nga mahibaloan. Karon, ayaw—ayaw hatagi og unsa man nga pagtagad kung unsa ang akong gramatika.

¹⁸³ Ug tingali maghunahuna kamo nga ang akong sermon ning buntaga wala gayud sa linya ug tanan na, ilinya ninyo kini sa Biblia usa ka higayon ug tan-awa kung wala ba kini mismo nakasentro sa target niini. Tan-awa kung ang inyo bang teleskopyo wala nakasentro sa diha nga inyong—inyong ginapunting kini didto. Ayaw kini ilinya sa kaugalingon ninyong mga panghunahuna, apan ilinya kini sa kung unsay Iyang giingon. “Masigpit ang pultahan, hiktin ang dalan, ug diyutay ra ang mga makatultol niini; tungod kay halapad ang dalan nga nagahatud ngadto sa pagkalaglag, ug haluag ang pultahan, ug daghan ang magasulod agi niini,” minilyon ka minilyon ka pilo ang magasulod dinha. Usa sa usa ka milyon siguro ang pag-ihap niini. Mao na kana. Mao kana ang giingon Niya. Karon, wala gayud Niya gisulti kung pila kini, apan nag-ingon Siya, “Maingon sa nahitabo kaniadto sa mga adlaw ni Noe, nga walo ra ka kalag. Maingon sa nahitabo kaniadto sa mga adlaw sa Sodoma, nga tulo ra.” Gikan sa maong tibuok butang, tulo ra ang naluwas, gikan sa kalayo. Mao usab kini ang mahitabo!

¹⁸⁴ Karon, kung aduna ma’y tawo nga tinuod gayud nga espirituwal, gusto kong tan-awon mo kini nga tawo nga nagalingkod dinhi, padayon niya gayud akong ginalantaw ingon sa mahimo niya. Mipataas sa iyang kamot, wala ako nakaila kaniya; wala ko pa siya kaniadto nakita, wala ko’y nahibaloan og unsa man bahin kaniya. Nagalingkod lang siya dinha nga nagalantaw kanako. Apan, kita n’yo, nagapakig-kontak siya, nagaampo siya. Karon, husto kana. Karon, kung isulti sa Ginoo kanako . . . Nagalingkod kana nga lalaki sa ingon ka halayo gikan kanako, ug kini ang una namong pagkitaay, ug anaa siya dinha nagalingkod. Kung igapadayag sa Dios kanako kung unsa ang iyang—kung unsay iyang . . . Ako—dili ako makaayo kaniya. Dili ko, dili ko mahimo kana, tungod kay gihimo na kana daan sa Dios. Apan magpataas kini sa inyong pagtoo. Makita na sa tanan karon, ania na Siya, ang mao ra sa gihapon nga Espiritu. Ug hinumdumi, gisaad na kini ni Jesus, sa wala pa ang kaulahi pang panahon. Mao na kini kaniadto pa ang kaulahi pang ilhanan.

185 Sa miaging adlaw, si Leo ug ako nagalingkod didto sa dalan, ug nagaestoryahanay ang uban kanamo. Ug sige kong nagbati nga adunay pagbag-o nga magaabot, usa ka pagbag-o nga moabot. Sa gihisgotan namo kadto, dili kadto mamahimong usa ka pagbag-o sa akong ministerio, tungod kay dili na mahimong magkaaduna pa'y pagbag-o, kondili usa kini ka pagbag-o kanako. Dugay na ako nga usa ka tawong maluyahon ug ginatugotan lang ang mga tawo nga pangunahan ako ug giyahan ako, ug ipadala sa *niining* dapit ug sa *nianang* dapit. Kung gibuhat ko lang unta ang butang nga gisulti kanako sa Ginoo nga buhaton kaniadto pa, wala unta ako sa problema nga nahimutangan ko sa karon. Magabiya ako sa sunod nga semana aron mag-inusara uban sa Dios. Oo, sir. Ako—kinahanglan makadungog ako gikan sa Langit. Dili ko gusto mamahimong usa ka tawong maluyahon, gusto kong barugan ang kaugalingon kong mga hugot nga pagtoo.

186 Ang maong lalaki, nagasige kini balik-balik kaniya, siya nga nagalingkod dinha mismo sa likod, tungod kay nagatoo kana nga lalaki, tinuod gayud siya nga nagatoo. Ginalantaw ko ang mga mananambong sa tanan nga dapit dinhi, ug nagabalik kini mismo sa maong lalaki. Aduna siya'y panginahanglan, may gibug-aton siya, apan para kini sa ubang tawo ang gibug-aton niya. Husto kana. Nagaampo ka para sa ubang tawo. May ubang tawo nga nahingawa ka diha sa imong kasingkasing. Husto kana, dili ba? Usa kini ka higala. Kung isulti ko kanimo kung unsay problema sa nianang higala, motoo ka ba kanako ingon nga alagad sa Dios? Ang pagkapalahubog niini. Husto kana. Kung husto kana, ipataas ang imong kamot.

187 Nagatoo ka ba? Adunay usa sa dapit dinhi nga mipataas sa ilang kamot, usa ka babaye dinhi dapit sa likod, usa ka tawo. Oo. Oo. Wala ka ba nakaila kanako? Estranghero ba ako kaninyong tanan? Wala ako nakaila kaninyo, apan nakaila ang Dios kaninyo. Nagatoo ba kamo niana? Kung ipadayag sa Dios kanako kung unsa ang anaa sa sulod sa inyong kasingkasing, motoo ba kamo kanako nga Iyang alagad? Gamay'ng gining, ang nagapaproblema kanimo mao kanang bata dinha. Husto. Ug kana nga bata adunay eczema sa iyang nawong. Wala na'y mahimo ang doktor bahin niini. Usa ikaw ka estranghero dinhi, ug ikaw ug ang imong minahal sa kinabuhi nagalingkod dinha. Nagatoo ka ba nga mahimong isulti sa Dios kanako kung kinsa ikaw o kung asa ka gikan? Nagatoo ka ba niini? Dawaton mo ba ang pagkaayo sa maong bata kung ayohon Niya kini? [Nagaingon ang maong babaye, "Oo—Ed.] Sige, puede ka nang mobalik sa Somerset, Kentucky, sa kung asa ka gikan. Ug toohi nga mamaayo siya, pagabiyaan sa eczema ang mao nga bata kung mahimo mong toohan kini.

188 Sa paglitok ko niana nga pulong, adunay nagatindog dinha sa likod sa pasilyo, taga-Somerset, Kentucky, nga nagaampo, nga

may sakit sa kasingkasing. Nagatoo ka ba nga ayohon kana sa Dios? Kung ginatoohan mo kini sa bug-os mong kasingkasing, ug toohan nga ang Dios magapang-ayo ug himoon kini nga ayo na.

¹⁸⁹ Dinhi, aniyay, nagtoo ko nga adunay nagpataas og kamot dinhi dapit, dinha mismo, usa ka gining. Oo, nakita ko ang imong kamot. Usa ba ako ka estranghero kanimo, gining? Wala ako nakaila kanimo. Wala pa gayud kita nagkatagbo. Nagatoo ka ba kanako ingon nga Iyang alagad? [Nagaingon ang maong babaye, “Oo”—Ed.] Nagatoo ka? Aduna ka’y gibug-aton diha sa imong kasingkasing, o kung unsa man. Motoo ka ba kung ipadayag kini sa Dios kanako, motoo ka ba nga ang mao ra kini nga Espiritu nga atua kaniadto kang Cristo? Ang imong bana nga nagalingkod dinha, nagatoo ba siya sa mao nga butang, usab? Tooohan mo ba ang mao ra sa gihapon nga butang? Mahitungod kini sa inyong gamay’ng anak nga babaye nga nagalingkod dinha nga tapad mo. Husto kana, aduna siya’y kanser. Apan nagatoo ka ba nga pagaayohon siya sa Dios? Kung nagatoo ka, ipataas ang imong kamot. Sige, ipandong ang inyong kamot sa mao nga bata.

¹⁹⁰ Ginoong Jesus, diha sa Presensiya sa Imong Espiritu, akong ginakondena ang yawa nga nagapatay sa mao nga bata. Akong ginabutang, pinaagi sa pagtoo, ang Dugo ni Jesus Cristo sa tunga sa mao nga mamumuno ug sa bata. Tugoti nga mabuhi kini. Amen.

¹⁹¹ Magtoo sa Dios. Ayaw pagduhaduha. “Kung ikaw makahimo sa pagtoo, ang tanang mga butang mahimo.” Kung ikaw makahimo sa pagtoo, ang tanang mga butang mahimo. Husto.

¹⁹² Aduna pa’y uban dinha sa likod nga mipataas sa ilang kamot, sa kon asa man, ikaw, usa ka babaye dinha sa tumoy. Nagatoo ka ba kanako ingon nga alagad sa Dios? Wala ako nakaila kanimo, wala ka nakaila kanako. Nagatoo ka ba nga mahimo sa Dios nga ipadayag kanako kung unsay imong sakit? Dawaton mo ba si Jesus ingon nga imong Mananambal o Magsasangkap, unsa man, unsa man kini. Ginatoohan mo ba kini kung ingon-ana? Sige, kung ingon-ana kana nga pagkanerbiyos nga nagkaaduna ka, nagkaaduna ka niini kaniadto. Kung husto kana, magtindog ka, kung husto kana, aron lang nga makita sa mga tawo nga kamatuoran kini. Sige, biyaan ka na niini karon. Magpauli ka ug mamaayo na. Panalanginan ka sa Dios.

Ikaw taga-Kentucky, usab. Uh-huh, husto kana.

¹⁹³ Ang babaye nga nagalingkod sunod kanimo taga-Kentucky, usab. Siya, usab. Wala ako nakaila kanimo, dili ba? Apan mahimo ko nga isulti kanimo nga adunay problema nga butang kanimo. Kung mahimo ko nga isulti kanimo kung unsay problema kanimo, dawaton mo ba si Cristo nga imong Mananambal? Anaa kini sa imong hawak. Kung husto kana, ipataas ang imong kamot, hataas gyud aron makita sa mga tawo.

Sige, pauli ka na karon, biyaan ka na niini. Giayo ka na sa imong pagtoo.

Ginahagit ko kamo nga motoo. Ginahagit ko ang inyong pagtoo nga motoo.

¹⁹⁴ Ania nagalingkod ang usa ka babaye dinhi, nagaampo, nga natabonan sa iyang panyo ang iyang nawong. Wala ako nakaila kanimo. Nakaila ang Dios kanimo. Ikaw taga-Joliet, Illinois, ug aduna ka'y tumor. Husto gyud kana. Tingali matingala ka . . . (Oo, kana ang—kana ang babaye nga gidala ni Rosella. Husto. Kadali lang, gisultihan niya ako bahin niana, apan wala siya nakahibalo nga wala gayud ako nakaila sa mao nga babaye. Husto kana. Nahitabo lang nga daku ang pagtoo sa mao nga babaye.) Sultihan ta ka og usa ka butang nga imong—nakahibalo ka nga wala ako nakaila kanimo. Nagaampo ka para sa niining bata nga nagalingkod dinhi sa tumoy sa bangko, nga may sakit. Imo kanang anak. Husto kana. Amen. Nasayod ka nga wala ako nakahibalo niana.

¹⁹⁵ Mao na Kini, ang Balaang Espiritu Kini! Nagatoo ba kamo Niini? Ginadawat ba ninyo Kini? Nan kung husto kana, kung unsa ang ginasulti ko bahin sa “masigpit ang pultahan, ug hiktin ang dalan” husto gyud. Si Jesus Cristo, ang Anak sa Dios, ania mismo karon. Ania mismo dinhi ang Espiritu sa buhing Dios. Nagatoo ba kamo Niini? Dayon, aron mahibaloan ninyo nga ako dili gayud sa kung kinsa makapang-ayo, dili ako ang mananambal kondili gipili lang ako sa Espiritu sa Dios aron mahipadayag Niya ang Iyang Kaugalingon. Wala ako'y edukasyon. Wala ako'y nahibaloan og unsa man. Apan ang Iyang Espiritu kini nga maoy nagabuhat niini, nakita n'yo, ug gusto Niyang mahibaloan ninyo nga nagasulti ako kaninyo sa Kamatuoran.

¹⁹⁶ Kini mao ang Kamatuoran, nga giayo na ni Jesus Cristo ang matag usa kaninyo mismo karon kung toohan ninyo kana. Karon sama gayud nga . . . Kung namuhat Kini didto sa Kingston, nga ang mga misyunero, o si kinsa man nga atua didto, nakita nga namuhat Kini didto sa Kingston, nga linibo ang nangaayo, nganong dili man Kini mamuhat dinhi sa Amerika kon diin nga ania na kini kanato karon. Nganong dili man nato mahimong toohan kini? Tungod kay dili nato malabang kanang gagmay nga mga nagababag. Nagatoo ba kamo niini? Ipataas ang inyong mga kamot.

¹⁹⁷ Karon, kanang mao ra nga mga kamot, ipandong sa tawong sunod kanimo, tugoti akong moampo alang kaniya gikan mismo dinhi, ug ayaw na gayud nga may pagduhaduha pa sa inyong kasingkasing, paundangon man gud niana kini.

¹⁹⁸ Oh, sus, Igsoong Neville! Daw sa unsa ko gipangandoy, daw sa unsa ko giampo, daw sa unsa ko . . . Tingali maghunahuna kamo nga wala ako sa akong kaugalingon; dili. Kabalo ako kung

asa ako mismo. Kung mapasabot ko lang unta kining gamay nga butang kaninyo! Kabalo ba mo nga si Jesus Cristo, ang Anak sa Dios, ania karon sa taliwala sa mga tawo ning buntaga, karon mismo, ania Siya mismo karon, nga nagapadayag sa Iyang Kaugalingon?

Bueno, moingon mo, “Igsoong Branham, *ikaw* kadto ang nagsulti.”

¹⁹⁹ Giunsa ko man pagsulti kadto? Wala man ako nakaila kaninyo. Adunay usa pa ka babaye nga may TB. Naayo ka na, igsoon. Panalanginan ka. Pasayloa ko, nagaampo ka alang sa usa ka babaye nga may TB, tungod kay usa kini ka ubanon nga babaye. Oo. Sige, toohan mo kini. Sige. Ania Siya dinhi. Ang Iyang Presensiya kini.

²⁰⁰ Karon, ania ang Iyang giingon, “Kini nga mga ilhanan maganunot kanila nga nagatoo. Kung pandongan nila sa ilang mga kamot ang mga masakiton, mangaayo ang mga niini.” Unsaon man Niya sa pagpamakak? Kita n’yo, wala na kini Kaniya, wala na kini kanako, sa inyo na kini karon. Karon toohan ninyo.

²⁰¹ Nagalantaw ako karon lang sa usa ka gamay nga babaye nga nagalingkod dinha sa likod, aduna siya’y dakung pagtoo. Bag-ohay lang siya ug ang iyang bana midawat sa Ginoo. Ania siya mismo niining panagtigum, aduna siya’y hernia nga pagaoperahan unta sa doktor bag-ohay pa, ug duol na siyang manganak. Ug operahan na siya sa doktor pagkahuman niadto, apan nanganak siya ug wala na sila’y makita nga hernia. Nawala na. Kita n’yo? Ngano man? Nagalingkod lang siya sama nga. . . Wala pa gayud siya nakaanhi sa entablado nga sama niana. Milingkod lang siya dinha sa likod ug gitooan kini. Husto ba kana, Mrs. Green, nagtoo ko nga siya kini, dinha sa likod? Husto kana. Nakita ba ninyo ang iyang kamot? Dili na makita sa doktor ang hernia, nawala gyud kini. Ngano man? Gitooan niya kini, migawas lang ug miingon, “Okey na!”

²⁰² Karon mao usab ang inyong buhaton, ug ang matag balatian nga aduna kamo mawala gayud. Dios, Nga makahimo—Nga makahimo sa pagsugo og Usa ka Butang ngadto sa lawas sa tawo, batok sa kakuyaw niadtong pagkapaak sa bitin nga atua sa tiil niadtong tawo, nga mohilo, aron patyon siya, ug mahimong pahunongon Niini kini ug patyon kini mismo dinha, unsa pa ka labaw kaha nga mahimo Niyang patyon ang mga balatian sa inyong lawas. Tungod nga, atua sa kalisdanan ang maong lalaki ug nagkinahanglan siya og tabang. Nagkinahanglan kamo, usab. Kung wala kamo niini, mamatay kamo.

²⁰³ Karon padayon nga ipandong ang inyong mga kamot sa usa’g usa. Ayaw pag-ampo alang sa inyong kaugalingon, mag-ampo alang sa tawong kasunod ninyo. Ingon niana ang pagka-Cristohanon.

204 Timan-i kini, timan-i kini, nga, kung unsa ang ginabuhat ninyo sa uban, ginabuhat ninyo kini kang Cristo. Pag-maayo ang inyong pagtagad sa uban, nagmaayo kamo kang Cristo. Pag-minaltrato ninyo ang uban, ginamaltrato ninyo si Cristo. Oh, sus!

205 Oh, kung maipasabot ko lang gyud unta kini, kung mahimo ko lang unta nga makita kini sa mga tawo, kung unsa ang akong ginalantaw ug kung unsa ang akong ginabati, ug kung unsa ang nahibaloan ko nga nagakahitabo karon, kita n'yo. Kung unsa nga ginapaninguhaan ni Cristo nga maduso kana nga Mensahe ning buntaga, nga maipasulod mismo sa kasingkasing sa mga tawo ug magbuhat og usa ka butang dinha; dili og usa ka paghugyaw, dili usa ka emosyon (unay nga kauban na niini kini), kondili ang magbuhat dinha og usa ka dili-mamatay nga pagtoo nga dili moingon, maghatag og usa ka pulgada sa kaaway.

206 Karon, Iyang pagadunggon ang akong pag-ampo, pagadunggon Niya ang sa inyo usab. Mag-inampoay kamo sa usa'g usa, samtang nagaampo ako para kaninyong tanan.

207 Oh Ginoo, sa niining daku og labing hinungdanon nga takna, nakahibalo kami nga mangahulogan kini og kalainan tali sa kamatayon ug kinabuhi, ngadto sa kadaghanan. Ug nagakurog ako diha sa Imong Presensiya, kay nahibalo ako, Ginoong Dios, nga kinahanglan akong mag-ampo sa bug-os kong kasingkasing. Nahibalo ako nga bisan pa nga mahimong wala na'y usa ka masakiton nga tawo sa taliwala namo sa sunod nga lima ka minuto, nga ang matag tawo dinhi makahibalo nga ania Ka karon. Ania sila nga nagatindog karong buntaga, Ginoo. Tugoti nga maipataas sa mga tawo ang ilang mga kamot nga nakahibalo nga wala ako nakaila kanila, ug nga walay nahibaloan og unsa man bahin kanila. Apan nakaila ang Imong Espiritu kanila. Nasayod Ikaw sa mga tinago sa ilang kasingkasing, unsa pa kaha ka labi pa nga nahibaloan Mo ang ilang mga balatian ug ang ilang mga pag-antus! Kung ingon-ana, Ginoo, tugoti nga mamahimo kini karong adlaw, tugoti nga mamahimo kini bisan karon nga pagahikapon sa Imong Espiritu ang ilang masakiton nga mga lawas. Itugot kini, Ginoo. Nagaampo na sila sa usa'g usa.

208 Ug nagaampo ako, Minahal nga Dios, nga himoon kini sa Espiritu Santo nga tinuod gayud ngadto kanila, nga dili na gayud nila kini pagduhaduhaan pag-usab. Ug aduna pa'y usa ka balatian, Ginoo, nga mas grabe pa kay sa niining balatian sa pisikal, ang balatian sa espirituwal. Hinaut nga maablihan ang matag kasingkasing.

209 Ginoo, giunsa man pagkahitabo nga nagtindog Ka didto sa tapad ni Abraham, ug gibuhat kining mao ra nga butang, giingnan si Sarah nga atua kaniadto "sa likod" Mo, nga giingon sa Kasulatan, "mikatawa siya sulod sa balong-balong," ug

gisultihan Mo siya. Ug naila ni Abraham nga si Elohim kadto, ang gamhanang Dios. Sa pipila lang ka minuto nawala Ka sa iyang panan-aw.

²¹⁰ Ug, Ginoo, niadtong mitindog si Jesus ug gibuhat ang mao ra usab nga butang, ug miingon, “Inyong ginatawag si Abraham nga inyong ‘amahan,’ ug bisan pa niana nagaingon kamo nga nahibalo kamo sa mga Kasulatan.” Miingon, “Nangasayup kamo, kay wala ninyo hibalo ang mga Kasulatan bisan ang Gahum sa Dios.” Ug ila Siyang gitawag nga “Beelzebub.”

²¹¹ Apan nagsaad Ka nga sa kaulahiing mga adlaw Imong igabubo ang Imong Espiritu pag-usab. Nag-ingon ang propeta, “Sa panahon sa kagabhion motungha ang Kahayag.” Ug ania na kami karon.

²¹² Sa diha nga kining ilehitimong kalibutan nagakabalintong sa kasal-anan, nga sama sa usa ka hubog nga tawo nga nagasarasay sa pagpauli diha sa gabii, dili magdugay og mobuto kini sa tunga, mahitabo nga wala ni bisan abog sa bulkan, halos, ang mahibilin niini. Ug makita namo nga nagakahurot na ang oras.

²¹³ Oh Dios, tangtanga ang matag pagduhaduha gikan kanamo. Dalha kami sa nianang pagbiyo mismo karon. Ari Ka, Balaang Espiritu. Ibukhad ang Imong dagkung mga pako, lumlumi kining nanambong nga mga tawo karon mismo, ug pun-a sa Imong Kaugalingon ang ilang mga kasingkasing, ug ipahibalo kanila nga Ikaw ang anaa sa Balaang Presensiya, nga Ikaw kini, “Ako ang Ginoo Nga nagaayo sa tanan ninyong mga balatian.” Ug hinaut nga buhaton sa Imong Presensiya ang usa ka butang diha sa ilang kasingkasing nga magpalakaw kanila gikan dinhi, ning buntaga, nga nagatoo uban sa tanan-tanan nga anaa kanila. Ug hinaut nga ang matag tawong may sakit ug nag-antus mamaayo.

²¹⁴ Kay, ingon nga Imong alagad, nagatindog ako ug ginakondena ang tanan nga yawa, ginakondena ang balatian, ginakondena si Satanas.

²¹⁵ Napildi ka na, ug ikaw walay lain kondili usa ka pagpanghulga lamang. Ug amo kang ginahagit ning buntaga, sa Ngalan ni Jesus Cristo. Ug ingon nga Iyang alagad, nga nagawali sa Iyang Pulong ug ginamantala ang Kamatuoran ngadto sa mga tawo, aron mahitul-id ug mahilinya sa Pulong sa Dios, ginakondena ko ikaw, Satanas, sa Ngalan ni Jesus Cristo. Lumayas ka sa matag usa niining mga tawo nga nanganhi nga gikan pa sa halayo ug sa duol, aron lang nga maayo. Magpahilayo ka sa niining mga nanambong ug sa niining mga tawo. Ginamandoan ko ikaw pinaagi sa buhi nga Dios. Ug giingon sa Biblia, “Ang pagpangamuyo sa tawong matarung, daku og kahimoan inig-ampo niya.” Ug daghang matarung nga mga kalalaken-an nga ginapandongan sa ilang mga kamot ang

mga masakiton, ning buntaga dinhi. Oh, Satanas, gusto mong ipahunahuna kanila nga ako kini, dayon kuhaon mo ang himaya gikan kanila. Apan ang ilang pagtoo kini sa Dios, usab, nagatoo sila sa Dios! Ug kinahanglan kang mohawa na, tungod sa ilang pagtoo. Busa lumayas ka na pahilayo dinhi, ug moadto ka ngadto sa kangitngitan sa gawas kon diin ka angay mopaingon. Ginakondena ko ikaw, sa Ngalan ni Jesus Cristo, pinaagi sa kagahum sa Biblia sa Dios, nga sugo sa usa ka Manolunda kanako. Karon layas, sa Ngalan ni Jesus Cristo, ug ipalingkawas sila. Amen.

²¹⁶ Nagatoo ba kamo, sa tibuok ninyong mga kasingkasing, nga giayo na kamo? Ipataas ang inyong kamot, ingna, “Akong ginadawat karon si Jesus Cristo ingon nga akong Mananambal. Ang tanan nga landong nanghawa na gikan kanako. Ako Siyang ginadawat karon diha sa kahupnganan sa Iyang gahum, diha sa pagkamahimayaon sa Iyang Presensiya. Ginadawat ko Siya.”

My faith looks up to Thee,
Thou Lamb of Calvary,
Saviour divine;
Now hear me while I pray,
Take all my sins away,
Nor let me ever stray
From Thee aside.

Karon ipataas nato ang atong mga kamot sa tuman nga makapahimuot gayud ngadto Kaniya karon.

While life's dark maze I tread,
And griefs around me spread,
Be Thou my Guide, O God;
Bid darkness turn to day,
Wipe sorrows fears away,
Nor let me ever stray
From Thee aside.

[Ginasugdan ni Igsoong Branham paglaylay sa *My Faith Looks Up To Thee*.—Ed.] . . . madagayaon gayud nga grasya! 

Ang Iglesia Ug Ang Kahimtang Niini
(*The Church And Its Condition*)
Agosto 5, 1956, Dominggo Sa Buntag

Masigpit Ang Pultahan
(*Strait Is The Gate*)
Marso 1, 1959, Dominggo Sa Buntag

Usa Ka Iglesiang Nalimbongan, Sa Kalibutan
(*A Deceived Church, By The World*)
Hunyo 28, 1959, Dominggo Sa Buntag

Kini nga mga Mensahe ni Igsoong William Marrion Branham, unang giwali sa Ingles didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik sa Ingles. Kining Cebuanong hubad pinatikan na ug gipang-apod-apod sa Voice Of God Recordings.

CEBUANO

©2014 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org